

C A U S Æ

(21.)

Ob quas

CAROLUS GUSTAVUS
SUECIÆ REX

Serenissimum Principem ac Dominum

Dominum

JOANNEM CASIMIRUM
REGEM POLONIÆ

ET

SUECIÆ HEREDITARIUM

Bellò adoriri coactum se profitetur

BREVES & PRÆLIMINARES

breviter

Limatæ & eliminatæ.



ANNO DOMINI MDCLVI.

St. 2379

Mx. 3633

K 509/88/1

Ad Lectorem.

NE mireris lector, si fortè Præliminares & vagæ Suetici furoris Causæ (si modò ita eas vocari fas est) à lima Polonica castigatæ lentius ad te perveniunt. Nam ut domesticâ adhuc feritate horridæ atque impolitæ à limine veræ sinceræque lucis passim aberrabant; ita ne nunc quidem, quamvis affabrè elimatæ & supra votum suum expolitæ, ad conspectûs & æstimationis publicæ limen luménque emitti valdè merebantur. Antea enim contemptui ac vanitati suæ relinqui poterant.

Ita sunt inaniis repletæ & araneis.

& sic indignitate ipsâ, & falsitate ac maledicentiâ facile repellebantur & refellebantur. Jam verò ne credas nos illis pretium & dignitatem addidisse, ut pretiosiores & honestiores, tam bellè ornatæ prodirent. Sed quemadmodum cum furunculis aut latrunculis blandè alicubi transigi solet, eas strictim veluti stigmatis & notis insignitas, sicque hoc quasi commeatu instructas leniter eliminari, vel (ut humaniùs cum iis ageretur) evadere permisimus. Ac ne hæc quidem

opellâ dignæ erant, ideóque deliberationi moram à principio aliquantulum injiciebant; quam postea augebat officinarum in tota vicinia tergiversatio, quæ atramentum & prælum, operamque omnem denegabant; Aliæ quidem metu, & nescio quò periculò excusationem protegentes, aliæ facinora & successus Sueticos favore, & applausu prosequentes, nihilque contra disciplinæ suæ collegas in publicum è suis torcularibus prodire permittentes. Ne tamen de impudentiæ felicitate, aut vulgi assentatione gloriari Advocatus Sueticus perpetuò posset, perruptis discussisque obstaculis, ei in causis suis exponendis larvam, quâ sibi placebat, interdum detraximus, alibi verò qualem meruit injecimus; ne vel hic nisi graphice exornatus incederet, vel illic falso excultus comptusque falleret aut illuderet. Interim si quæ voluit quæque libuit, libero ore effutiit, non mirabitur, si vicissim quæ nolit, quæque non libet, audiet. Tuum est, sincere lector, non quid tardius, sed quid justius veriúsque, & quod publicâ ac Regiâ fide, nec non obligatione atque honore dignius est, ad animi & censuræ tuæ candorem admittere. *Vale.*

EX

Ex Pactis Polono Sueticis

ARTICULUS. XXII.

Durantibus ac currentibus hisce Induciis, agatur de pace perpetua, loco & tempore, Interventúque Principum mediatorum, de quibus inter partes, curâ ac diligentia Illustrissimi Ducis Curlandiæ, convenerit. Ita tamen, ut si tractatus pacis perpetuæ semel aut iterum non successerit, firmæ nihilominus & inviolabiles maneant Induciæ, usque ad exitum Pactis hisce præfinitum.

Ex iisdem pactis.

ARTICULUS. XIX.

Quod si quid gravius inciderit, quod violationem Pacto-
rum concernere videretur, dentur utrinque Commissarii,
qui loco aliquo ad fines Livoniæ assignando conveniant,
& controversias exortas sopiant decidantque.

Ex Instrumento pacis Germanicæ

ARTICULUS. VII. vers IX.

Hæc pacificatione comprehendantur ex parte Serenissimi Imperatoris, omnes suæ Majestatis fœderati & adherentes. Imprimis Rex Catholicus, Domus Austriaca, Sacri Romani Imperii Electores, Principes, intèrque eos Dux Sabaudia, cæterique Status, comprehensâ liberâ & immediatâ Imperii Nobilitate, & Civitates Anseaticæ. Item Rex Angliæ, Rex & Regna Daniae Noruegiæque cum annexis Provinciis, ut & Ducatu Schlesiensi. Rex Poloniae, Dux Lotharingiæ, omnèsque Principes, & Respublicæ Italiæ, Ordinèsque Fœderati Belgii &c.

In-

Instrumentum Limitationis

In primo congressu Lubecensi mediante
Christianissimi Regis Legato confectum.

CUm juxta Induciarum pacta Stumdorffiana Anni 1635, hortantibus etiam communibus amicis, Principibus ac Rebuspublicis, Celsissimoque Duce Curlandiae rem promovente, in Consilio pacis perpetuae inter Reges Regnaque Poloniae & Sueciae stabilienda eousque ventum fuerit, ut praefixo tempore à Christianissimo Rege, primario Mediatore, cum ipsis Regibus, tum & ceteris Mediatoribus, Commissarii utrinque delecti sub finem proximè praeteriti Veris cum Christianissimi Regis Consiliario secretiore & ad hos tractatus pacis Legato plenipotentiaro Illustrissimo Domino Petro Chanut in loco acceptato convenerint, factumque sit, ut in ipso dehinc aditu conventus difficultates quaedam subortae moras objicerent, unde susceptum apparatu multo negotium eò prolabi jam instante hyeme videbatur, ut re prorsus infecta, & penè non tentata, discessio fieret; Indignum utroque foret, si praeter expectationem tanta molitio ad utriusque gentis concordiam & emolumentum instituta caderet incassum, suadente praesertim Christianissimi Regis Legato, & fidem interponente, quod cum frequentibus colloquiis sincerissimam in utriusque partis Commissariis faciendae pacis ac incundae amicitiae voluntatem deprehendisset, spes certa melioris eventus affulgeret, ejusque promovendi gratia, media quaedam ab eodem Legato proponerentur. Nos sub libera Ratihabitione Serenissimae Reginae Dominae nostrae Clementissimae consensimus & convenimus, ut congressus hic noster secundum supradicta Pacta Induciarum reassumatur ad vicesimum diem mensis Aprilis Stylo veteri anni 1652. proximè instantis, quo praesigente Christianissimo. Rege
eadem

eadem tractatio pacis inchoabitur & concludetur, spatio duorum mensium, Maji scilicet & Junii, quo emenso liberum erit utrique parti à Conventu abscedere, illæsis induciis, quamvis negotium nondum sit ad finem perductum, nisi ex mutuo consensu terminus iste fuerit prorogatus. Et quò planior expeditiorque fiat tractandi ratio, ubi cœptum fuerit futurum istud colloquium per continuatam Christianissimi Regis mediationem, eodem quo suscepta est studio à sua Majestate eademque diligentia & integritate, qua per supra memoratum Legatum est administrata, procurabitur medio tempore, ut quæ hæctenus causæ hujus Conventus progressui obsuere, tollantur, ipsiusque disceptationis materia, quo fieri dabitur modo, tractabilior evadat. Hanc verò conventionem & sponsonem, ita demum valere volumus & vim habituram intelligimus, si quemadmodum eam in supradicti Legati Domini Chanut manibus concredimus, sic etiam par omnino conventio & sponso huic nostræ ex æquo respondens à parte Poloniæ apud dictum Dominum Legatum deponatur ab Illustribus, Illustrissimis, Magnificis & Generosis Dominis Legatis Polonicis. In horum fidem præsentis literas manibus nostris subscripsimus & sigillis nostris firmavimus Lubecæ XII die Mensis Octob. Anni millesimi sexcentissimi quinquagesimi primi

Johannes Adeler Salvius L. S.

Schering Rosenhan L. S.

Johan Wachmeister L. S.

Laurentius Canterstein L. S.

Exemplar originale conventionis hujus suprâ scriptæ depositum est in manibus meis ab illustrissimis Dominis Legatis Sueticis in eo nominatis hic Lubecæ die 12. Octob. St. N. anno MDC LI.

Chanut L. S.

Ego Secretarius Poloniæ Legationis accepi ab Illustrissimo Domino Christianissimi Regis Legato apographum suprâ scriptum Lubecæ die & anno quibus supra.

Limatio seu Eliminatio

Causarum Suscepti

à

CAROLO GUSTAVO

Contra

JOANNEM CASIMIRUM

Poloniæ & Sueciæ Regem hæreditarium Belli.



Veteri & Mimico proverbio incipit calumnia Suetica, quia à novo & syncero Veriverbio incipere non potuit. Et sic quidem à veteri more non recedit Suecia; Ubi tam facile est Reges è Regno dejicere, quàm Romæ sub Tarquiniis papaverum capita decutere. Domi tamen ferè hoc solum antea levitas aut ferocia audebat; nunc foris verò, sub alio nomine, tanquam licito, (quod mox prodetur) novus è Suecia Rex sibi fas esse contendit, ut aliena Regna rapiat aut diripiat; atque ut specimen aliquod, non tam juris quàm *necessitatis* habere videatur, catapultariâ voce *coaclum* se ad hoc profitetur. Putares Herculem ab Eurystheo ad Reges & monstra expugnanda compulsus. Interim Causarum quarundam larvas, veluti faciales Sueticos, è variarum criminatationum cavèis præmisit; ipse mox tanquam furia secuturus. Furore enim ex impatientia concepto, in bellum & arma raptum se agnoscit, & prædicat; quod alii nemini dicere liceret; Digno certe belli apud Suecos Auctore. Et sic facile etiam Causarum posthac æquitas, sanitasque si qua fuisset, in principio statim vulnerata & corrupta, se pariter & insaniam prodit. Quid ergo sani aut synceri in causis hujusmodi esse potest, ubi furor solus, causa

tota solâque belli fuit? Crederes Lapithas & reliquos Centauros è Pindo & Othry repente irruisse. Sed nihil novi furorem esse, in parte familiæ Regiæ Suecorum, peregrina pariter, & domestica illic historia testatur: Ericum enim Gustavi prioris filium natu maximum, duo fratres Principes publico scripto incusârunt, damnaruntque; quòd furendo sæviendoque Proceres quosdam Regni, aut suâ, aut alienâ manu trucidârît, quodque ipsos fratres, carcere & ignominiâ, & seipsum infami conjugio, atque aliis ludibriis deformârît: Nec furorem hunc, nisi carcere vicissim, & forsan pejori fato expiâsse secretior rumor tradidit. Alium quoque fratrem germanum Magnum nomine, obvia historia memorat, perpetuis ferè furiis actum, ideòque claustris & vinculis coercitum, ne citò totus periret. Et de tertio fratre quid dubitamus, Caroli tantùm Sudermanni nomine, antequam Regnum raperet, noto? quippe quem fratris Regis filios duos, regni hæredes proximos Regno spoliâsse, tantùmque sanguinis nobilis & plebeji fudisse audivimus aut legimus, quantum nullam tyrannorum classẽ in Suecia profudisse, annales Suctici tradunt. Sed & tunc furorem ejus regaliter emicuisse, Rex Daniæ solenni scripto prodidit; cùm is præter morem omnium ætatum & Regum Sueciæ, Septemtrionalium Lapponum Regem sese appellavit, scripsit, jactavit; quorum tamen nullam Urbem, nullam civitatem, rarissimos pagos, vel incertas & mutatorias tantùm sedes, monstrant tabulæ septemtrionales; quique omnes simul conglobati, ne particulam quidem Regni conficere possent, quorùmque maximam Danus partem suam esse contendebat Sed has tam generosas muscas bellè bello excussit, simulque septemtrionem falsum, & veram quandam Sueciæ partem, aliquamdiu ei ademit, vel excussit Danorum Rex. Et hujus Caroli nepos, sed ex deteriori sexu, ne meliora sperare liceat, est hodiernus Sueciæ Rex; qui (quod alii Reges non fecerant) se palàm profiteatur *furere*. Cum tali itaque res nunc erit, cum hoc disceptandum nunc, agendumque, cui *patientiam furor*, comparendi & defendendi se facultatem, jura omnia legesque negant & adimunt; nul-

lùmque

Georg:
Trifa-
rol: in
refuta-
tione
Skytii.

lúmque in foro aut iudicio libero & legitimo locum relinquunt. In iure certè communi, publico, & civili hoc manifestum est, quod quidem in Suecia cum reliqua civilitate non admitti ajunt; Imò XII. tabulæ, è Græciæ severa antiquitate conscriptæ, & omnia postea Jura legésque alibi, ne suas quidem res administrandi furiosis permittunt facultatem. Unde ergo tam liberi & confidentis *facinoris* privilegium ac gloriam, gloriosum Regem accepisse, & vindicasse sibi putamus? aut à qua auctoritate tam *Regalem furendi* licentiam assumpsisse credimus? à *veteri* inquit *verbo*: & quod illud? *patientia læsa fit furor*. Sed cur *vetus* & obsoletum elegit? quia nullum novum, idoneum facinori suo invenit. An quia *vetus* in familia furor? Cur verò furiale potiùs quàm modestum quæsitivum? quidni ideo, quia nihil modeste acturus erat? maluit ergo è scena & theatro turpitudinis, inter

mimos obscena jocantes

quærere, quod in Academiâ, aut Stoâ, vel Socraticis tabulis nusquam reperisset. Mimus enim erat & servus, & Syrus Publius *Verbi* hujus auctor, cui ad fabulam peragendam popelli applausus satis erat. Sed neque in sacris, neque in Regiis usquam aut illustrium Virorum verbis, dignius se, & facto suo regio *Verbum* Rex cum tota Schola Suetica invenit, verùm eò angustiarum redactus est, ut docentes, vel

imitantes turpia mimos,

in tam magno & excelso negotio Magistros, atque Doctores solos haberet. Quanto graviùs & innocentius ille Principem instruxit, qui *Verborum* intemperantiam non ex Majestate regiâ esse docuit; Muliebri verò esse, furere in ira monuit. Sic tamen reperto assumptoque furore tanquam jure vel oraculo se Rex ille tuctur, publicèque Cæsari, Regibus, ac Rebus publicis, generique humano persuadere conatur, se, dum *impatiens* est, dum *furit*, dum insanit, ritè, rectè, justè agere; & synceras verásque Causas habere, *enumerare*, vulgare. A tali itaque quid expectas

Seneca
Lib: 1.
de Cle-
mentia

lector ? fani-ne aliquid , vel aliud , quàm quod à *furibundo vel furioso* procedit ? quod nomen ipse sibi , vel Causarius & defensor ipsius , ci induit . Nam à furore quid potest nisi furiosus deduci ? Et quamvis è domesticâ seu Pomeranicâ officinâ caprimulgus aliquis , aut Vertumnus mercenarius , adulatrici interpretatione , veluti butyraceo unguento *Verbi* atrocitatem mollire voluerit : furorem Germanicè , **grim** / vertendo , nunquam tamen vel gry quidem , minùs erit *furiosus* quàm **vnfinnigh** / **wittigh** / **rafende** / qualem factò Rex ipso egregie se præstitit : Nam idem & accusator , & testis , & iudex , & exsecutor , & Unus omnia est , simulque queritur , arguit , damnat , plectit , & dolo , vi , ferro flammis grassatur ; Depopulationibus , carceribus , exiliis , & vastitate Provinciarum , templorum , oppidorum , pagorum , Nobilium cædibus , deprædationibus , captivitatibus etiam contra fidem datam , aut malignè monstratam promissamque sævit . Hoc quidem plus est quàm *furere* . Nam si id agit ut Polonia fiat sua , cur

vult esse nullam ?

vel ubique afflictam , exhaustam , oppressam ? profectò nisi furiosus
nemo sic vastat sua ;

An ideo quoque defensionis suæ capita illa captiosa , trunca , cassâ , *Causas* tantùm vocat , quia justas ut vocaret , hoc elogium addere non potuit ? Sed & *breves* appellat , & revera sunt ; quia ad veritatem nusquam pertingunt , licèt Herculeo gradu , aliquandiu incedere sibi videatur . Postremò & præliminares vocat , nam ne limen quidem justitiæ attingunt : Nempè & canes catenarii limen non intrant , sed foris latrant . Cæterùm quidquid rei sit , quidquid & ipse sit , non severiùs examinantes , audiamus inquam *Causas* , & (si Diis placet) rationes , sed tanquam furiosi , quod unicum præ cæteris nomen Causarius Regi suo veluti clypeum elegit ad eò illum

. *solus jam præstare potest*
furor infontem .

quia forte apud molliores Juris interpretes legit ; *furiosos* ob delicta

cta non puniri: oblitus, eos pœnâ non eximi in enormibus criminibus, qualia sunt pactorum violationes, & illa quæ paulò antè enumerata sunt.

In Prima itaque Causa, ne de furore dubitemus, vivus mortuos incurfat, vexat, lacerat. Olim Plancius aliquis, cum mortuis non nisi larvas luctari dixit; ita nunc Regem suum viventem, in Vladislâum ante aliquot annos defunctum, Causarius immittit, committitque; quod ne quidem Neronis aut Caligulæ arena vidit, tantò palâm hîc, ipso furiarum regno iniquior; Ubi mortui tantùm ad mortuorum tribunalia delati judicantur. Poterat & hîc larva esse, prout larvatus in causis incedit, nisi *furiosus* esse maluisset, talem ergo sinamus esse, ne examen & refutationem, indignâ fatigemus curâ. Sed & ne obscurum esset, unde cum causâ longinquus Causarius & peregrinator advenerit, ex inferis Botthium quendam adducit, quem ait, Non potuisse cum militaribus copiis, inscio & invito Vladislao Rege Poloniæ, tot Provincias & Ducatus Regni pervadere ad infestandam Livoniam. nec satis est; sed certis documentis constare illum à Vladislao instigatum, ferociter adjicit & confusè, ut furiosi solent; omniâque conturbat, nec falsa aut vana à veris distinguit: Cur enim sigillatim & candidè non exprimit, quis ille Botthius (jam in cognomine suo quodammodo fatuus) fuerit, & à quo mandatis, armis, copiisque & sumptibus instructus, aliquò pervaserit? Cur non fatetur cum Cæsarianum Ductorem, Cæsarisque auspiciis ac stipendiis, militem, si quem habuit, collegisse, adduxisse, in rem Cæsaris procurasse, tentasseque armorum diversionem, ut Sueticæ fortè militiæ partem è Germania detraheret, virésque imminueret? Cùm ergo Cæsarianus minister & tribunus fuerit, Cæsarisque consiliis, jussibus, usibusque operam dederit, quâ specie, aut quâ fronte Causarius, Vladislâi eam instigationibus ascribit, & attribuit. Itâ ne Cæsar & Vladislâus idem? Germani & Poloni iidem? aut cur non audeat Cæsarem, & Cæsariana insi-

gnia vel imperia nominare? Nempe facilior adhuc res est cum
 Polonis solis, domestico externoque bello impeditis, omisâ
 interim aut suspensâ contra Cæsarem fiducia, aut rabiè, nisi forte
 pactis Germaniæ cum Suecis impeditur. Quasi verò Germania &
 Cæsar non etiam Poloniæ Regem & Regnum, imò ipse Succus
 pactis adscripserit, & comprehenderit, quæ si in his non servat, sed
 tam apertè violat, quomodo illis servabit, si occasio, aut furor
 similis provocaverit? Quid deinde certi & proprii incrementi
 accessisset Vladislao, si Botthius Cæsari Rigam & Livoniam ad-
 junxisset? præsertim si in Germania Magnus Teutonici Ordinis
 Magister, titulum, jusque seu prætensionem, sibi retinere, ac
 vindicare non omittat. Aliter tamen Causarius innuere videtur,
 cum hæc subjicit. Proinde nec à veritate alienum est, ha-
 buisse tum temporis Lithvanos exercitum ad manum,
 quo recuperarent Livoniam, exercitu tunc & præsidiis
 destitutam, si propositum Botthio ex voto successisset.
 Sed facile se ipsam confutat calumnia; nam si exercitus *aliquis*
Lithvanicus ideo paratus erat, sicque Rex Botthium instigabat;
 quare illum seu partem illius exercitus in auxilium non submitit,
 aut submitti non permisit? præsertim si ex tali submissione, &
 successu parati auxilii, sperabatur, aut parabatur Livoniæ recu-
 peratio? Anne enim Vladisläum hoc exercitu, & hæc occasione
 instructum, credimus *instigationem* deserturum fuisse? Quid deinde
Lithvanis exercitu suo armatis optatius, aut gloriosius accidere
 potuisset, quàm amissæ Rigæ & Livoniæ vel dedecus abolere, vel
 jacturam sarcire, sui que commodi fortunam apertam atque invi-
 tantem prosequi, & facile atque utiliter exsequi? quod tunc in
 promptu, & ad manum (ut loquitur Causarius) fuisset, si ad hoc
 vota, spes, cupiditatem, vires, nempe exercitum habebant; tantâ
 rerum opportunitate lacescente & promovente? Itaque cum hæc
 nimis clara ac manifesta essent, & calumnia ultra omnis proba-
 bilitatis speciem ascenderet; languescente non ultro impudentiâ,
 ad minimum Lithvanos auctores Botthio fuisse, monstro-

sâ voce asseverat. Siccine enim hoc minimum est , maximi scilicet facinoris auctores esse, quo penè abrepta est Succiæ Livonia. Auctores tamen quomodo Jurisconsulte Suetice ex Matella Baldi probas? Quia inquis, ubi prohibere voluissent Lithvani, potuissent. Itanc auctoritates magnas, & capitales, probari leges Sueticæ docent? aliorum pudet afferre; Nam vestras quis novit aut vidit, ubi nutu, suspicione, jussuque Principum crimina etiam atrocissima, usque ad furcas & patibula probari, cruenta historia prodit? Interim quoniam ad minima redactus es, vir minimi precii, *ad minimum* ostende, quibus omnino pactis, aut quâ verborum necessitudine, quove erga se beneficio Lithvaniæ Ordines obligatos evincas, ut ii exercitus pro Succis instruant, alant, educant; ad illorum hostes, suo periculo vel sumptu *impediendos*, ubi enim tales Induciarum conditiones? ubi hæc amicitia vel obligationis mutæ, aut Lithvaniæ cum Succis fœdera conscripta, pignorâque data atque accepta, publicæ tabulæ habent? Dolo & scelere vos Livoniam Lithvanis abstulistis, & tu vis, ut ii vicissim loco gratitudinis, & bene meritæ mercedis legiones conscribant, propriisque stipendiis foveant, ad Livoniæ insidiatores reprimendos. Astringe validius ori frontique larvam, ne per convitia & figmenta totus pudor tibi exeat, si modò quis adhuc superest.

Simile quid etiam Polonis antea vanissimo impulsu imputasti, quod mihi fortè per absurda aviâque te persequenti exciderat: Nam iis non tantùm scientibus, verùm etiam impellentibus hoc accidisse, desolatissimo argumento arguebas, eò quòd scilicet, per literas Suetici Senatores, apud Senatores Poloniæ questi, nihil solatii retulerint. An tu quoque ab eo tempore

inconsolabile vulnus, Mente premis tacitâ?

Sed dic, quid tuo animo ægre est, ut frigidam affundam. Solatium verò de facto alieno, quod debebant vobis Poloni? aut quod mittere poterant? imò quid juris tunc illis in *Botthium* esse potuit, si

is in potestate vestra erat? Tamque vilem vos eum quare habuistis, quem tot facinoribus noxium, tam leviter dimisistis, vel abire permisistis? aut cur tam otiosè & negligenter tot damnorum (ut prætendis) patratores custodistis? Non est hoc moris, aut genii Suetici, ut tam leviter malè facta erga vos, & injurias remittatis, sicque evadere sinatis. Venit quidem è Suecia Gorgonius aliquis Varfaviam cum literis & querelis ad Senatores in aula Polonica constitutos; Is hospitio & humanitate promptè honoratus, literæ etiam amicæ acceptæ lectæque publicè sunt. Omnibus ignota & inaudita antea erat Botthii non tantùm machinatio, sed & nomen ipsum; Nec Gorgonius complicem aliquem, vel conscium, multò minùs impulsorem, *nedum consensum Ordinum*, sine quo nulla res momenti alicujus auctoritatem in Polonia habet, profiteri, vel edere, aut insinuare potuit. Responsum ergo retulit plenum æquissimæ purgationis & innocentia; quid enim aliud ab innoxia auctoritate referri vel exposci poterat? Sed & in Lithvania Dux Radzivilius campi (ut vocant) tunc Marsalcus, commissionem utriusque nationis, secundùm pacta institui à Governatore Rigenfi postulavit, qui tamen ipse accedere noluit, sed alios delegavit, qui re libere syncerèque discussâ, palàm declarârunt ac testati sunt, ex ipsius Botthii confessione constare, Ordines Regni & Magni Ducatus Lithvaniæ, immunes esse à *molitione* ipsius, licèt nebulam malè indutæ suspicionis de conscientia Regis Vladislai non statim decusserint; quippe quam Sueticus sol brumalis decoquere, aut disjicere nondum poterat, nam hyems fortè erat &

gelido concretus frigore sanguis

non sinebat rationales & ingenuos spiritus ad cerebrum ascendere.

Piget diutiùs in Botthii hæere fabula: Post illam tu Parem rationem irruptionis Crocovianæ in Pomeraniam vocas subnectisque; parem *vanitatem* volebas dicere, & hanc paritatem non negamus; ut tamen Polonos reos facti Crocoviani facias, irruptionem averti à Polonis potuisse astruis, nisi ii *Pome-*

raniam

raniam devastatam voluissent. Si de voluntate sola nugaris, & intimos quoque Polonorum affectûs Suecis obligatos, atque obnoxios, magnâ & singulari tuâ voluntate vis, nimis delicatæ humanitatis es. Non putabamus certè nos tam familiares & conjunctos esse vobis, ut velle & nolle idem ambobus populis esset. Sed & Polonos potuisse hoc velle, & Crocovium avertere cum octo millibus irrumpentem, quomodo fidem facis? Nam ut pares illi avertendo essent, quanto exercitu opus fuisse censes? Is verò unde repente, aut quibus ex causis antea paratus erat? Pro eximia sanè verecundiâ tua, talem hîc fingere non es ausus: Quibus denique meritis hoc vobis deberi persuades, ut Polonia suis impendiis instructos exercitus habeat, ac limites vestros defendat? Aut quoties hoc repetendum est, nullo jure, nullis pactis, vel officiis vestris, ad hos animos, ad hæc incommoda, & sumptus præstandos, Poloniam vobis inscriptam, & oppignoratam devinctâque esse. Quodsi Procerum aliquis Unus, dum suis aut cognatorum amicorumque prædiis metueret, neque satîs virium ad resistendum Crocovio militariter haberet, ab eodem vel obfides, vel fidem, aut pignus securitatis, humano more petiit, privatus hic metus, curâque seu industria fuit: Neque adeò tamen is irrumpendi libertatem dedisse videri potest, prout nec dare potuit. Atque ita quaecunque hoc factum ipsius, neque Regi, neque Ordinibus Regni imputari potest. At reditum Crocovio refugo prohibere debebant Poloni, si culpâ vacare voluissent, Suecis utique id petentibus: vel saltem iis denegare haud facile debebant, ut ipsis quoque per Poloniam persequi liceret Crocovium, quod quia non fecerunt, manifestum Polonorum, hostilem erga Suecos animum exinde deducis. Sed an Poloni *Crocovium reditu prohibere* debuerint, vel potuerint, non hîc repetam, quia jam satîs antè declaratum est, cum de illo avertendo ac etiam Botthio impediendo, actum est; nihil horum vobis deberi; Et in Crocovio

præstari non potuisse, in Botthio non debuisset. Vos autem *petiisse* aut vobis *petentibus denegatam facultatem persequendi per Poloniam Crocovii*, quia in publica aut certa notitia, non satis constat, neque tu clarè doces, à quibus Polonis talem facultatem habentibus petierint, vel repulsam passi sint Sueci, ne mirabere, si ignota & absurda nemo comprehendere, vel assequi planè queat! Nomina Regem Ordinésque Regni si potes? si non potes, quare *hostilem ideo animum*, cùmque manifestum Regi Ordinibusque assignas, & cam ob causam bello persequendos declaras, adeo dictatoriâ auctoritate instructas, ut nihil minùs tibi liceat libeâtque, quàm olim Sullæ, vel si quis postea plus ausus est? Tormenta verò aliâque auxilia, publico scitu concessionéque è Pucensi fortalitio, vel aliunde submissa Crocovio, quia in re tam sonora nullus præter te audivit, vel scivit, tibi quoque quamvis Stentore clamofiori, nemo credet, & ideo refutatione sonantiore, aut clariore non dignabor; nam tormenta illa, quæ somnias, fortè bombi Cassubici fuère, ad quos te remitto.

Interea dum Polonis hostilitatem, ob denegata vobis contra Crocovium officia, affingis, cur de humanitate, & beneficio, aliàs vobis præstito, de quo queri Cæsar etiam potuisset, cur inquam tam malignè obliuofus aut mutus es? scilicet rerum omnium, quæ neque unquam fuère, neque futura sunt gnarissimo, ignotum aut leve saltem visum est, ac silentio toto dignum; quòd cum Bannierus vester Generalis in terga recedens, & Cæsaris tunc validiora arma declinans, partem copiarum uxori fugienti circumdedisset, tunc tempore inquam tam periculoso, hanc uxorem ejus refugium in Polonia petentem, toto cum militari præsidio Palatinatus Posnaniensis comiter admiserit, & hospitaliter acceperit, ac deinde per Poloniam honorificè deduci curaverit? Adeò beneficia non computatis, maleficia etiam fingitis, aut pro beneficiis redditis. An verò vos Sueci soli omnes gentes ac nationes, omnia facta & benefacta vobis adesse & servire vultis, & sic *impeditiones, averfiones, prohibitiones hostium*, vobis obsequi, exercitûs etiam, ubi nulli sunt, deberi vestris nutibus contenditis; & si id
non

non promptè properéque fiat, tales pro hostibus habetis; *Ita Vos Trojgenæ vobis ignoscitis*: in aliis omnibus omnia accusatis, punitis, etiam dum indebita & impossibilia exigitis. Illud jam à te non quæram, quare Crocovium Cæsarianum fuisse Ductorem taceas, quia antea in Botthio similem dissimulationem detexi discussique. Nam si in Cæsare Crocovii irruptio oblitterata est, ob pacta pacis Germaniæ vobiscum confirmatæ, oblitterari quoque à te Poloniæ accusatio debebat; Namque & Poloniam ibi comprehensam monui.

Post hæc jam terra tota & continens omnis fingentem conturbantemque te deficit, simulque

. *deficiunt artes, deficiuntque doli.*

Ac propterea maria & fluctûs, ubi turbida omnia, invadis. Quomodo illic ad Insulam OEseliam appulsus sis non quæro, scio quàm res tempestuosa sit mare. Si in Cretam ejectus fuisses, nec Græciæ hodie ac ne sacra quidem auctoritas de mendace dubitarent. Sed nec sic quidem malè cretizas; adeò grandiora & atrociora omnia vero, illic confingis. Ais enim OEseliam regiis è Polonia machinationibus tentatam, & ad defectionem Ordines OEselianos cum impeditioe cessionis Danicæ sollicitatos à Vladislao IV, licèt nihil Juris in illam Insulam toto tempore, quo sub Dano erat, prætenderit. Sed hæc tibi *unde animi caligo & magna oblivio rerum?* Illo enim tempore etiam ne Vladislâus in mundo fuit? cui enim alteri verbum illud *prætenderit* applicas? An quàm longam linguam calumniator habet, tam longum ævum Reges habent? De jure tamen, quod tu subticuisti, cur non licuit *Vladislao prætere*, vel tentare aliquid, quandojam Insulæ status mutaretur, & de novo ageretur præjudicio? Neque enim sub Dano ab altissima & continua vetustate Insula illa fuit, neque perpetuo vel immutabili jure ad illum devenerat: Sed cum Livonia continuis Moschorum irruptionibus conquassata, resistendo amplius non esset, & aliqui incolarum aliis vicinis, Magister verò ipse Ordinis, supremus & legitimus totius Pro-

Epime-
nides, &
ex eo S.
Paulus.

Joan.
Itac:
Pont.
Hist.
Dan.
lib. 8.
pag. 341.

vinciæ Dominus , protectioni Regum Regniq̄ue Poloniæ totaliter se subjecisset ; OEselia quoque pars fati violenti facta est. Nam Episcopus ejus Joannes Munghausen , pactâ & acceptâ certâ pecuniæ summâ Regi Daniæ , seu fratri ejus Magno eam tradidit : Ordini tamen & consequenter successori legitimo Ordinis jure Reëmptionis servato ac derelicto : Prout etiam in altero vicino Curonensi Episcopatu accidit cum Castro & territorio Piltensi. Quapropter cum Vladislâus intellexisset id agi tractariq̄ue , ut OEselia à Dano ad Succos transferretur, veluti imploratus & non violentus Ordinis successor, & Livoniæ multos per annos optimæ fidei possessor , misit statim Bergium Cubicularium suum , qui oblata constitutæ olim pactæque pecuniæ summâ , ageret de suspensione cessionis, sive intromissionis in Insulam . donec per interpositionem Regis Galliæ , vel alterius , aut ipsâ æquitate monente , aliquid aliud liberum & non obligatum, Succis à Rege Daniæ daretur. Sed cum Insula Succis potior alieno Jure esset , & bolus hic insatiabiliter illis placeret saperétque : Protestatio sola nudâque insinuata fuit, quâ illud caveretur, ne nova & dispar Succorum à Danis possessio Juri Reëmptionis seu potioritatis (ut vocant) quicquam præjudicaret, neve illud hâc mutatione penitus tolleretur obruereturque , & sic facultas omnis redimendi , simul silentio oblitterata interiret. Neque hoc pro *solicitatione ad defectionem* censi haberique solet, sed passim protestatio talis, citra Jurium quorumvis damnum licita est , licitéque admittitur , nisi ubi vis & injuria prævalet. Ut verò gratis aut vi ullâ omnino Insula ad Vladislâum transiret , aut per sollicitationem violentam Succis eriperetur , tunc literis nudis & chartacæ contestationi tribuis , dum Græco sono tumidum Diploma, Græcule hoplomache, eam vocas? poma aurea, quàm Diploma ad corrumpendos Ordines efficacius dixisses ; vel arma, vires, classem, aut etiam militem ad hunc paratum instructumque habuisse, & unâ immisisse Vladislâum cur ad fidem faciendam dicere non es ausus; sine quibus defectio strui aut sperari non potuisset? Præterea cur de negotii totius & Insulæ conditione , atque aliis circumstantiis , quibus

OEselia

Oeselia obnoxia erat, cur inquam magis mutus es, quàm mutum est mare, seu maris Norvegici asellus siccissimus; quamvis aliàs in calumniando, vocalior sis quàm Asinus Arcadicus, & tympano Helvetico sonorior? Nimirum aliter, haud quaquam tibi promptum erat, hominibus rerum longin quarum ignaris fucum facere. An nisi sic quoque Regis tui *Causa* juvari, fucarique, aut non aliter Regia esse potuit?

Brevis deinde tibi ex Oeselia saltus in Livoniam per mare angustum fuit; levissimus enim est mendaciorum trajectus, quæ tibi pro velis, remisque fuere; Sed & sic Naufragus atque ab omni veritate nudus appulisti, adeo ut ne tabulæ quidem ulli infistas, in qua ostendere queas, tentatam in Livonia subditorum Sue-ticorum à Rege Vladislao fidem, & tamen id haud incertis testimoniis constare *incertissimus testis* asseveras. Si tu cum Ulysse illo mendacissimo, similiter Naufrago ad Phæacas abjectus fuisses, certè multò audaciùs tu Læstrigonas, Cyclopas, Monoculos aliòsque

. . . *Aeneos fratres cælo capita alta ferentes*
& fabulosa alia quæ

. . . *Ithacus nullo sub teste canebat,*
effingere & commemorare potuisses; Poëta tamen Latinus, non
Tam vacuum capitis populum Phæaca putavit;

ut talia crederet. Tu nunc omnes lectores *causarum* tuarum stupidiores Phæacibus autumas; ut tibi fidem habeant, qui in tanta testimoniorum incertitudine, (ut gloriaris) in tanta impudentia, quam profiteris, ne Unius quidem testimonii larvam adducere potueris. Cùm itaque nullum neque diem, neque annum, neque sæculum, nullumque hominem testem, etiam ex vicino forno seu tabernâ Æstonicâ nominare queas, ignosce, si tibi intestato nemo credat, neque injurato. Nasica enim non es, quamvis probe nasutus, neque Cato unquam fuisti; Catonis tamen, quem aliter orcum vocant, non indignus, ubi falsos testes, testiculorum damno puniri crediderim. Sed neque jurato tibi facile quisquam, extra Scenam vel Orchestram Succiæ credit, qui jura omnia sup-primens aut pervertens,

. . . . *conceptis verbis perjuras,*

si Nero tuus jubeat.

Olas
Magn.
lib. 3.
c. 15.

Breviter ergo projecto in medium insolenti mendacio, nec probato, quasi puderet, quod tamen apud te insolens est, è Livonia te proripiens, ceu nodi Lapponici abreptus turbine, quò furiosissimè navigari Nobilissimus portentorum, & vester historicus prodit, repentè in *Dania* constitisti, mox aliò atque aliò, palcæ æstivæ pulvisculo levior abripiendus. Si Cymbria Danicæ pars Cymmeria esset Regio, non mirarer tenebras te inde offundere; Cæterùm sic quoque tenebras, sed fugacissimas captas, quia mox per compendia cæca, ne luce prodaris, diffugiens: Non defuisse, ais, cum Rege Danicæ tum temporis alieniore, ut & cum Arnheimis, ac Baudisso molitiones in perniciem Sueciæ, quæ singula referre longum foret, & à proposito compendio alienum. Non à compendio, sed à veritate alicnum dicere debebas. Sed ubi tu non à *proposito* veritatis alienaris, quam semper postponis ac rejicis? verè Plutarchus! *compendiaria res est improbitas, virtus longa*, tibi longinqua fanè, quia tamen ita vis, quàm potes maximè,

Tam verba confer maximè ad compendium

ne deprehendaris; quia falsitatem prodere mora solet. Cur verò alieniorem, non addens cuinam, Regem Danicæ dicis? si vobis; meritò de injuriis à vestra eï ferocia illatis taces, & hoc quoque compendium est. Quòd si tamen Regis illius *alienationem* erga vos, rumorum loquacitas etiam in Poloniam attulit, cùmque contra Sueciam aliquid moliri vel meditari vicino murmure increbuit. Quidni Vladislàus de suo in Sueciam hæreditatis Jure timeret? Vel cum tam potenti hoste Sueciæ, cur non cautum ac provisum vellet, si liceret? Hunc enim meminit esse, qui antea Caroli Sudermanni convitiis ac malefactis laceffitus, in Sueciam armis irrupit, gravissimis damnis afflixit, ac penè abripuit; longè certè latèque diripuit, ac vastavit. Quam si idem tunc aggrediretur, eamque suo & veteri Regum Danicæ more odioque invaderet,

deret, annon difficilior postea de jure hæreditario actio, cum Victore & Invasore, rebus adeo mutatis foret? Præsertim cum Daniæ Reges Jus sibi in Succiam non obscure prætere dicantur, atque ideo Succia insignia, tres coronas mordicus retineant; & vobis Succis invitis, infra aut post securim Norvegicam, palam ponant, gestent ostententque; Quod si aliquid ab illo impetrare licuisset Vladislao, ne iterum apud alios atque alios Succia aut tota, aut totum Succia Jus penitus periret, an hoc à justâ & licitâ futuri curâ alienum? aut à legitimo hærede deferendum, quiscquam præter te diceret? Cur verò Molitiones has perniciosas Suecia, in nullis iterum circumstantiis prodis? pecuniam, classem, exercitum à Vladislao submissum, aut promissum Daniæ Regi ad minimum insinuare poteras. Absque his enim, quis hodie aliquid magni molitur aut sperat? Nam talia ut fidem mereantur, non omnino silentium poscunt, nec fugitivam tantum mentionem, aut præteritionem Rhetoricam admittunt; sed & hoc tu *compendium* vocas. Agnosco vocem; *compendio* enim etiam latrones ac fures, & silentio tenebrisque gaudent, quos postea suspensum merito in lucem educit, & illustrat. Histe tenebriosis compendiaris, compendiosissime calumniator, cum furtivis utique plumis convitiis adjungas licet, quia veras & synceras non habes, etiam cum tam plumatus incedis, quàm exercitus Indicus. Interea & ego.

Si quid tibi compendi facere possim, faciam:

Utque levior incedas, detraham tibi alienas plumas, ut merito

. *moveas cornicula risum*

furtivis nudata coloribus:

Nam veri in Succia & Succis, jam diu desiere.

Inter compendiaris itaque adhuc causas post Regem Daniæ Arnheimius & Baudisius, tanquam duo fulmina belli, aut totidem Annibales, non absque horrore in theatrum à te producuntur; ac si cum his quoque, licet nullo regno, nullâ potentiâ, nullâ denique classe, imò milite, sumptuque nullo instructis, in

per-

perniciem Sueciæ Vladislavii molitiones aliquas agita-
verit, quarum tamen nullas monstras. Et Arnheimius quidem
(Philosophicum Generalem, honorato joco Gustavus Adolphus
vocitasse fertur) nihil admodum magnum & admirandum Polo-
nis in Prussia approbavit, adeò ut post ludibria aliquot tunc obla-
ta Rege Sigismundo, Principe Vladislao, & Proceribus ad
spectaculum virtutis militaris, contra Suecos sub Albo monte
invitatis, meritò amotus fuerit: hunc tamen tu Vladislao hic
objicis. Sueticum verò Manifestum Anni 1644. Mense Februario
editum, Regi Daniæ. cum simili sive querelâ sive vanitate expo-
brat. An fortè in duorum Regum tunc obsequium divisus fuit?
An verò singulare aliquid & illustre his duobus Regibus usque in
perniciem Sueciæ præstare potuisset, non valde ipsi Sueci testati
sunt, quando illum astu doctore in Sueciam abreptum (si vera
narrantur) ita clusum, inclusumque & custoditum voluere, ut
non solum è custodia, sed ex tota Suecia illa suspicacissima, oculo-
sissima, auricissima, montosissima, paludosissima, vastissima
impune evaserit.

Baudisus autem ille bis captus, & crebrius molæ Stargardianæ
assidens, vel postea in aula; an ad molendum aliquid contra
Sueciam in copiis, vel viribus propriis, vel aliunde habuerit,
etiamsi cum ex corpusculo illo suo in Herculem vel Atlantem
excrevisse fingas, quis vidit? quis audivit? si tamen peritia bellica
hunc Baudisium, vel illum Arnheimium Vladislao Regi commen-
dabat: Et Baudisus forte studio conatûve, aut obsequio frequen-
tiore Regi sese insinuabat, offerebaturque; quid miremur, aut
quid tu exprobras militares viros, militaris Regis genio placuisse?
Quid alii Reges? An non pacis tempore, ac etiam cum nihil
moluntur viros magnæ solertiæ, & dexteritatis bellicæ opinione
approbatos sibi circumdant, eorumque familiaritate licite dele-
ctantur. Magni certè videris Baudisium facere, ita illum, tan-
quam Ulysses & Ajacem in Equo Durateo ad *perniciem* Trojæ,
cum aliis Heroibus inclusis, tu intra tuarum *Causarum* capsam
occlusum, in Sueciæ perniciem erupturum nominas.

Forti posthæc, uti post fortes viros, & operoso verbo partem primam Causarum lacerarum concludis: *Hæc tempore Vladislâi I V patrata*. Quid verò tu pater patrata, patratum esse hæctenus ostendisti? Botthium enim & Crocovium solummodò tentasse aliquid, sed elusos; Bergium sollicitasse defectionem Oeseliæ falsus es; nec nisi tentatam Livonum fidem, nullo ibidem nominato, brevissimis verbis mentitus es. Sed nec cum Rege Daniæ, & postremis duobus Bellisariis *patratum* aliquid in ullo facto, vel expeditione dixisti; tempore autem Vladislâi non à Vladislao *patrata* quod dixeris nescio an ultrò an per impudentiæ modestiam feceris. Quamquam nec illud verè dixisti, multò minus hoc, cum Vladislâus nihil omnino, neque ipse, neque per Reges alios aut mercenarios Heroas quicquam *patrârit*, quod verbi atrocitatem impleat, si tamen aliquid *patravit* (vide quam ordine & clarè tecum ago) cur vivo ea illi non objecistis? Nunc in Umbra defuncti piacula Sueci quæritis, & manes sepulti violatis, eumque inculatis, qui se defendere non potest: cum tamen saxa ipsa mortuis pacem præstent, aut loquantur, oréntve post funera quietem.

Deinde inficiari nequis Causaric, post omnia illa, sive vera sive falsa à te enumerata, Regem & Regnum Poloniæ, ad pacta pacis generalis Germaniæ, non modò à Cæsare, sed & à vobis ipsis, Succis, admissum, adscriptum, inque illis comprehensum esse. Inspice Articulum sive Caput xvii. pag. 119. Lipsien. edit. Quâ fronte ergo, aut quo Jure eadem, etiamsi hostilia fuissent, publicæ tamen pacis sinu excepta, & tantâ Regum ac Mediatorum auctoritate, Sueciæque totius consensu, ac confirmatione, iam diu sopita, sepulta, antiquata, tu iterum resuscitas, & veluti ad pœnam ac supplicium vocas? Hæccine Sueciæ Tricoronigeræ fides, sinceritas, constantia vel innocentia est? An leo Gothicus, aut recens accessoria bestia Gryps ita sævit? Nam vuipem nondum inter insignia publica videmus, interfacta agnoscimus. Præterea etiamsi Rex mortuus, culpæ aut suspitioni apud vos obnoxius verè falsòve esset, nullatenus eïdem tamen, ita Ordines Regni Poloniæ im-

pliciti & innexi sunt, ut noxæ Regiæ, si qua fuisset, simul obnoxii vel astringi à te possint. Scire enim debes in libero Regno, non solum distincta & separata ista esse, sed etiam mutua Induciarum pacta non cum illo, aut ullo solo Rege, verum nominatim, distinctè & expresse cum Regno, & Ordinibus Poloniæ solenniter inita, conscripta ac stabilita esse; atque ita à Rege quomocunque incusato ad Regnum & Ordines, argumentationem, & culpam, si quam probasses, rite ac legitime duci trahive non posse. Quæ tu verò Ordinibus vel consciis, vel auctoribus tentata aut patrata, aliquando. Sed non ubique affinxisti, ea suis jam locis, inania, falsa, gerrásque Germanas, aut Sueticas calumnias fuisse, satis ostensum est; illuc ergo te rejicio.

Cum autem in omni Jure ac foro, manifestum illud ac necessarium sit, ut in criminalibus, quales sunt Regum accusationes, & pactorum violatorum facinora, luce meridianâ clariores sint probationes & documenta; Quid à te hucusque, vel posthac aliud, quàm continua figmenta, & vanissimarum suspicionum fumi, ac densissimarum calumniarum nebulæ lectoribus offunditur? Et hæc talia, tu tamen Causas vocas, quæ si loqui possent, nil aliud de se dicerent, quàm

Nos numerus sumus.

Postremo, tametsi *Vladislao vel conscio, vel non invito, adebque Instiganti* quasdam objicias causas, cur Regem Casimirum reum, & hostilitatem meritum contendis, urgésque? Successit quidem ille Vladislao, sed non ut hæres, nec hæreditario jure, nam per libera & operosa suffragia, nec extra periculi aleam venit, nec fratris nomen inducit hæreditariam successionem, aut culpæ aliqujus complicitatem, vel imputationem, nisi fortè in Succia; ubi legimus Joannem, Sigismundi fratrem, proximum Regni hæredem, non solum Regno, verum etiam Magni Ducatus Finlandiæ privilegio, à Carolo & vestris constitutionibus privatum, exutumque. Neque tamen licèt hæres fuisset Casimirus, luere deberet ea, quæ pacis Germaniæ legibus ac solennitatibus sopita, jam ante monuimus.

Quia

Quia verò propria ac particularia quædam convafasti, quæ ipsi Casimiro Regi imputares, ne effugeret tuas criminationes, & bellicum Regis tui furorem; prodeant sanè, sed ordine tuo, qui scelera ordinare & calumnias nosti, ut non nisi ordinatum apud te nefas incedat.

Primus ergo impetus, quasi ingratitude Regis Casimiri erga Reginam Christinam exprobrat; putares hospitem illum Naufragum in Macedonia accusari, qui mox benefactorem ædibus ac facultatibus suis spoliavit. Ad ingratitude verò probandam, quæ adducis? Regina, *inquis*, Sueciæ propinquo arctoque sanguinis nexu Joanni Casimiro devincta, illum Ordinibus Poloniæ, non solum conjunctim cum fratre, sed & sigillatim commendavit, annitebaturque omni modo, ut is voti sui compos, ad Regnum Poloniæ consequendum fieret; Hòcque studium Reginæ mox prosperum eventum fuisse consecutum: sed Regem Casimirum nihilo mitiorem se præbuisse, sequentibus te probaturum polliceris.

Seneca
lib. 4. de
benef.
c. 37.

Nunc tandem probationes promittis, quod antea à te exprimi non potuit; præstolabimur itaque probatæ fidèi & claritudinis probationes. Interim tamen nè nimis *arctum hunc sanguinis nexum* in Regina jactes aut commendes, nimis enim suspecta hæc tua benevolentia est;

. . . *An quicquid calcaveris hic, rosa fiet?*

Nimis cruenta exempla in illa familia præcesserunt, in qua tu propinquum arctumque sanguinis nexum tantopere deprædicas. Avus Reginæ Carolus, annon propinquiori nexu fuit Sigismundo devinctus, quàm hæc Regina est Casimiro, & tamen nullus arctioris sanguinis nexus, neque necessitudo, pietati Jurive ulli devincere cum potuit, quin Sigismundum ejusque posteritatem ac sanguinem, quam longissimè è Regno detruderet, expelleret, arcerétque semper. Et quamvis sanguinem ejus non fuderit, fudit

tamen nobilitatis, populique omnis, qui regio Sigismundi sacramento, arctius fideliusque devincti erant. Hic quoque Carolus Gustavus, *tam propinquo nexu devinctus est* Casimiro, quàm fuit Christina; An ideo tantùm ut ad Regnum Poloniæ armis *propinquaret*, illo etiam extruso

Est prorsus iste gentis armigeræ furor.

à Carolo in hunc transmissus. Interim tamen cum eo Christianæ Reginæ affectum studiùmque non comparabimus; imò ne miscbimus quidem. Sed nec ideo Ordines Regni Poloniæ Joannem Casimirum, si absque Christianæ literis, electionis fatum sollicitasset, minus electuri fuissent; cujus facti rationes hîc non opus est commemorare. Literario tamen hoc Reginæ beneficio ornatus Casimirus; dic? quo, postquam Rex liberis Ordinum suffragiis electus est, quo inquam ludibrio, contemptu, aut piaculo beneficium illud epistolare, & gratitudinis suæ debitum, atque hostimentum hostiliter corruperit, aut violârît; ut propterea nunc bello à Carolo Gustavo successore mirifico Reginæ persequendus, adeoque inhumaniter & inclementer, supra omnem cognati sanguinis modum ac proportionem puniendus sit.

In commercio, *inquis*, literarum cum Regina Sueciæ Latinâ linguâ uti noluit; nullam aliam ob causam, quàm ut hocce modo devitaret eam titulorum rationem, quæ Pactis induciarum est expressa, titulùmque Sueciæ, Sueciæ Regibus astruit; Poloniæ verò Regibus derogat: id unice agens, ut hâc viâ pactorum fundamenta convelleret;

Quid? etiamne convulsa sum, &

. . . ruere omnia visa repente?

Cuniculis, terræmotibus, tempestatibus validioribus, non tam facili vi, vel, ut tu loqueris, *viâ* convelli fundamenta solent. Mirificus certè viator es, sed qui sæpiùs de *via* omni recta, ad avia, ab omni probabilitate & veritate erro voluntarius *convelleris*. An verò Epistola Gallica, tanto cum impetu aut turbine venit?

nit, aut Medæ verbis herbisve exarata infectaque erat, quibus illa arcem Creontis evertit? vel adeo

tota, succusso solo nutavit aula

vestra, quamvis super rupium fundamenta (ut ferunt) extructa? Mirum ni etiam

. divulsa repente

maxima dissiluisse capacis mœnia mundi

dicas. Non enim levis est potentiæ fundamenta convellere, quod vix Neptuno Deo assingere Poëtarum audacia potuit, à quo Trojanos

. muros magnosque emota tridenti

Fundamenta quati, totamque è sedibus urbem

visam erui evertique, Trojanus exul fœminæ credulitati, per convivii libertatem narravit.

Unde verò vobis Succis istud Gallicæ linguæ odium? vobis, inquam, qui nihil nisi Gallicum strepitis, spiratis, induitis, sectamini, Gallicè braccati, caligati, ocreati, fimbriati, plumati, Gallici nuper stipendiarii, mercenarii, & clientes passim. Gallicis verbis, tanquam Unicis floribus, literas vestras, non Latinas, interspergentes, exornantésque. Quid Galliæ Rex? an non domesticâ linguâ ad Reges Principesque externos passim scribit? Ea Gallicæ linguæ majestas est, aut censetur, ita certè observatur coliturque, nec in suo Regno cedit Romanæ. Sed procul à tui animi observantia, istud vilipendium est, amicæ & regnatricis linguæ, sine cujus cognitione, nemo in ulla ferè aula satis cultus incedit. Latinam tamen linguam pluris facis, quamvis in Latio domesticè & populariter perierit, ut vos eam in; ultimo Septemtrione retinere-tis, ne ultrâ abiret! Sed non injuriam faciam synceritati tuæ in hac causa unicè probanda: Ideo non licuisse Gallicâ, vel aliâ quàm Latinâ linguâ Casimiro uti, Dictator Latine dicitas, scilicet *ut per hoc compendium evitaret titulorum rationem in Induciarum pactis expressam*. Sed quid ais? annè Induciæ etiam decrevere, non licere nisi linguâ Latinâ ad Reginas vestras scribere? Deinde, an non in Gallicis literis Christinam Reginam inscriptio vocabat? Casimi-

rus verò , nunquid in iis literis , se Regem Sueciæ appellabat , aut titulum ejus sibi arrogabat ? vel ampliùs quàm Joannem Casimirum sese subscribat : Et Vladisläus non semel, licet Germanicâ linguâ ita scribebat. Alii quoque Reges alibi , dum familiari inter consanguineos commercio literarum , quasi privatim utuntur , seponunt interim aliquid de Majestate publica , nominibus suis & conscientiâ contemi. Sic quoque Regem Sigismundum, non rarò ad Hispaniarum Monarcham scripsisse vidimus , aut scimus. Reginam scilicet Sueci omnibus Reginis doctiorem habuissis , dignam ideo Romanis tantum verbis adorari , quia nunc Romam adoravit. Si tamen Regina literis , sine titulorum omnium pompâ venientibus lædebatur, iisque *convelli fundamenta Induciarum censebat*, quare eas toties acceptavit ? quare ipsa Latinissimis verbis & literis non exprobravit ? non improbavit ! Sed tardè, ô Sueci , Reginam , tanquam hujusmodi nugis læsam advocatis, quæ vos fugit , horruit , abhorruit : Nescis an à vobis non graviùs læsa , aut lædenda fortassis , nisi sese honorificè & tempestivè subduxisset. Ceterum quid novi Reginas ex Suecia fugere ? Mater Christinæ quoties aufugit , aut tentavit fugere ? Sed ut ex hoc diverticulo ad viam redeatur , quem tu ex pactis Induciarum articulum vel paragraphum producis , aut producere , productissimè hominum potes, *quo expressa sit ratio & lex*, quâ uti debeant, vel uti jubeantur obligenturque Reges Poloniæ , ad literas in Sueciam scribendas. An ita forte observatum fuisse in conscriptione Induciarum , per tuum hunc loquendi modum intelligis ? & hoc tu *expressum vocas* ? Ignoras video, vel ignorare te simulas, Commissarios vestros , dum (ut infra dicitur) Lubecæ eodem argumento, atque ejusdem fere criminis, optimas, aliàs plenipotentias Polonicas , condemnare studerent, probationem aliam in supplementum hujus assertionis suæ producere non potuisse , quàm quod in tractatibus ultimis Prussicis , Polonici Commissarii verbò promiserint syncero , Regem Regnùmque Poloniæ , in literis ad Reginam Regnùmque Sueciæ cum adhibituros esse stylum , quo contenti erunt : Nullâ unquam & præsertim tum temporis, de hac

vel

vel aliâ linguâ , factâ mentione. Sed preme sanè ut vis , ut potes, verba , capita , & non articulos tantum , verum etiam totum corpus Pactorum : Exprime intima extima , ac etiam remotissima ; quicquam ne hujusmodi ex illo Colosso papyraceo expressum dabis ? Regulas juris si nosti , scis quid edicant , si non nosti , potuisses utique tantis Arcadicis auribus tuis audisse , quod expressa noceant , non expressa non noceant. Quare in posterum , si quid occultius & abstrusius habes , quod exprimere non potes , saltem id inter expressa non numeres. Nam quod mox subjungis , tam expresse falsum est , ut digitis palpari possit , nisi larva esset. Asseris enim

Certo certius liquere , Regem Poloniæ insudasse superius indigitatæ Livonum defectioni , & Rigæ capiendæ consilia captasse. Sudum est cælum , in qua parte Livoniæ hoc liquet ? aut quando liquebat ? exere , extende , distende *digitum* etiam impudentem , aut quomodo Poëtæ vocant , quem ego dicere nolo ; ostende in loco , tempore , aut circumstantiâ *judatam defectionem*. An digitos forte Colossi Rhodii habes , qui per diversa litora , extendebatur , cum tam longinqua , aut nunquam gesta , visâve indigetes ? Unum illius digitum pauci homines , ulnis totis complecti poterant ; tu uno quàm vasta , quàm immensa , & extra hunc orbem , vel nusquam vagantia figmenta amplecteris , aut consecraris ? Herclè si mons Athos in formam , seu statuam Alexandri Magni edolatus aut efformatus à Dinocrate fuisset , prout is industriam offerebat , cujus manus una amplitudinem capacissimæ urbis teneret ; illius digitus par tuo non esset. Sed vide , ut sic etiam indigitare defectionem illam possis ; Nam procul extra veritatis orbem ea à te fingitur. Quia tamen

. . . . *magno gaudes sudare tumultu*

dic quomodo , cum quo , per quem , *insudarit Rex Poloniæ* , iste nondum Rex Tibi quidem mendaciorum facilis , promptusve

. . . . *sudor fluit undique rivis*

aliis ad insudandum rebus falsis , non eadem facilitas ? Quæ tamen

men est illa superiùs à te indigitata defectio ? De nulla alia ante facta est mentio, quàm quæ à Botthio ineptè repræsentata in fumum abiit. Atqui illic *Vladislaus Regem instigasse*, *Ordines verò Poloniæ auctores fuisse* asserebas. Sed quid tunc fuit Casimirus, aut quem nunc facis ? *indigita* saltem nomen, titulúmque aliquem ; Sed videris assuevisse cum Siculis, aut Calabriticis circulatoribus micare *digitis*, atque ita conjectoris ludicri artificium agere. Dic ergo clariùs, ut si tibi adeò certò liquet id, aliis etiam liquere possit, quibus talia exponis. Verùm nimis perfluit hic liquor, quem ex nebulis Aristophanis, aut è Luna navigabili Luciani, cribro Pomeranico collegisti. Et quamvis totus via lactea (quam ajunt liquidissimam & clarissimam cœli partem esse) effeceris, nunquam tamen Cymmerias tenebras exues, quas obstinato calumniandi genio induisti ; Cæterùm cum Botthio fati antea frustra defudasti ; ubi quia tandem refrixisse valde accusationem tuam in figmentis suis nudatam ostenderimus, te in furno Livonico, ubi ignitis lapidibus sudorem humanissimè provocari ajunt, post tot cursus ac recursus sudantem, anui domesticæ fricandum ac refricandum relinquemus.

A Livoniâ deinde, & à Dünæ fluvii viciniâ ad Borysthenem usque solito impetu profiliens ; Cosacos ut in Livoniam irrumperent à Rege Poloniæ invitatos fuisse, haud levibus indiciis compertum habere Regem vestrum. Sed haud satis gravis ipse index exclamas ; nam si aliquod saltem *indicium* attulisses, gravior certè testis videreris ; apparet indicia tua tam levia fuisse, ut repente in itinere evanuerint : Quod verò invitatos tantùm, non conductos, non adductos, non jussos *irrumperere Cosacos dicis*, humaniter & præter morem tuæ accusationis facis ; atqui mundo universo fati constat Regem Casimirum statim simul cum diademate, & trabecâ ægali sagum induere coactum ; neque semel iterùmque, sed pluribus vicibus, & per longiores moras, cum Cosacis dubiam pacis bellique aleam repetiisse. Visi quidem illi sunt aliquando pacis conditiones recipere, sed feroci semper cum ambiguitate, & metu, seu suspitione : Ideoque securissima semper
con-

consilia , loca atque præsidia , sibi circumdedere , nullis fluminibus , paludibus , desertis , montibus , aut monumentis , quantumvis operosè quæritis firmatisque , satis fidentes . Et tu hos re verâ , tam procul domo invitari , vel educi aut sperari etiam ab aliquo potuisse , ut invitarentur , alióque educerentur , dices aut credis ? scilicet ut refugiis suis & munitionibus excederent , virésque imminuerent eas dividendo , & in Livoniam usque alienando ; præfidiâque sua desererent vel debilitarent , tot molestiis , periculis , & sanguine tanto parta stabilitâque ? Vis autem tu haud leve indicium , hujus sive timoris sive obstinationis , simul & vanitatis tuæ ? Aliquamdiu soli & suis viribus , bellum atque rebellionem susceperunt & prosequuti sunt , postea quasi necessitate coacti , etiam inimicas antè gentes in auxilium asciverunt , quarum amicitia nunquam sine damno constat : si itaque toti (ut ita dicam) & integri non suis viribus fidebant , quomodo distringi , atque Poloniam & Lithyaniam ultra dissipari abigique militiæ suæ robora , passuri fuissent , qui jam non absque alienis subsidiis plenæ securitatis fidem inducebant vel admittebant ? Quod si aliquis vel Procerum , vel Aulicorum , vel nobilitatis Ruthenicæ , privatim optare , vel cupere potuit , aut inter rumores susurrósve fortè est auditus , qui Cosacos nunquam quiescentes , sempérque timendos , ut rariores domi debilioresque fierent , in Pontum Euxinum vel Thraciæ littora spargendos , & dividendos , suspirio vel promiscui desiderii impetu inuisset ? suaderéque etiam voluisset ; vel si alius simili voto in Livoniam aberrasset , (illam nimirum partem , quæ Poloniæ adhuc parebat , & omni quasi cultore vacua fuit) atque ut illuc transportari è Russia possent , ferventiori fiduciâ inuisset , quid hoc ad publicum consilium vel consensum pertinet trahiturve ? aut quomodo hoc ad spes Regias ascendere potuit , cum re ipsâ absurdum & impossibile esset , à suspicaci , & intolerabilis duritiæ indole , & iterum atque iterum rebellatura ferocia hoc obtineri . Non refert itaque quantum tu audeas , qui quovis , *dices , sub judice vidi quæ non vidisti , audivi , quæ non audisti* , etiam sub cælo alio , aut nusquam gesta .

Anverò vos Sueci semper quieti , & innocentes , intra ambitio-
nis vestræ scopulos , specúsque hæseritis ? jam non in partibus
Moschoviæ , Pomeraniæ , Mechelburgi , Transalbianæ regionis
aut Daniæ quæremus , quas mirabiliter nullo fortè jure rapuistis ?
Propior erit locus & non unâ fraude nobilitatus. Quod verò ais ,
Polonos non potuisse culpâre vos , causâ fractæ pacis ,
si nunc primum *fractam* , violatam , ruptamque *pacem* intelligis ,
nimis factus es nugator. Aliàs modestia hæc non innocentia ve-
stræ , sed indoli Polonorum assignanda est , quæ non tam querula ,
non tam prompta fingendi artifex est quàm vestra ; postquam
culpâs in aliis confingere non industriæ tantùm , sed justitiæ glo-
riæque pars splendidissima apud vos censetur. Sed quid opus est
aliquid fingere , cùm Induciæ palàm violatæ fractæque satis pro-
dant , nimiùmque comprobent , quid jam diu moliti , quid ma-
chinati sitis , quidque tot annis moliendo , ac machinando agita-
veritis. Quandoquidem ergo & hoc elicere , atque exposcere , &
veluti extorquere videris à patientiæ Polonicæ moderatione , non
fraudabo expectationis tuæ impudentiam hâc voluptate & hono-
re , ut legas videâsque etiam oculis ab Argo mutuo sumptis , quàm
spissâ sædâque se culpâ induerit Succia , & quod non semel , verùm
etiam sæpius culpari potuerit , quamvis tacente Poloniâ , utpote
quæ fraudem , non usque *ad frangendam pacem* , & bellum ante
temporis præfiniti leges inferendum , erupturam speraverat , aut
timere poterat. Quando enim , ô Sueci , moliri & agitare contra
pacta non incepistis ? aut quando desiistis ? Nam ut priùs Moscho-
viticum bellum omittatur , quo Vladislâus impetitus est , quibus
non rebus , quibus non artificiis ac documentis Moscum instruxe-
ritis ? Adeò ut Bibliothecas quoque vestras excusseritis , & Gedani
scripta typis edita conquiveritis , & si quid ultrâ in Polonia vul-
gatum erat , quod Moscorum nomini grave videretur , id repente
cum promptissima interpretatione Moscovitiæ bili subministra-
veritis. Quis deinde consilia ipsa , artes , disciplinas , magistròs , in-
structores militares in Moscoviam à vobis submissos enumeret ,
ut sic nulla in parte hostilitate contra Poloniam deessetis ? Quic-
quid

quid præterea te lorum armorumque cudi, excudi & fabricari in Succia, montium ferreorum fertilitas sinebat, id Moschis accelerabatur, parabatur, concedebatur. Si militi quoque externo per Succiaë limites aut mare, sinusque maris Suetici perque flumina transitus facilior in Moschoviam, quam per glaciale Oceum erat, Succia repente operam ac facilitatem accommodabat. Hæc omnia aut plura, nunc quoque ad recentem hanc Moschorum irruptionem, paratissima votis studiisque suppeditasse Succiam, quis nescit aut dubitat? Cùmque jam Moschus Smolensco occupato Mohiloviam obsidione premeret, vester nuntius cum literis ad hostem deprehensus est, dignus quidem ad furcam rapi, tamen quia nondum trans mare perfidia Suetica publicè navigaverat in Pomeraniam, & in apertum contra Polonos bellum, candor fidesque Polona, portitorem infestarum literarum pactis magis quam meritis condonavit. Quis deinde satis recensere queat quibus pactis, Moschum nunc contra Polonos animaveritis, nunc illum certos intra limites firmaveritis, ut solis Polonis noceret, vobis interim & vestris finibus intactis? ut facile hinc constare possit, maxima ex parte bellum hoc Moschoviticum vestris consiliis, artificiis, & machinationibus assignari posse, ut tantò commodiùs vos ex altera parte, & latere Poloniam aggredere mini.

Neque hoc satis, nam vos in Cosacorum animos irrepsisse etiamne negabitis, quorum rebellionem vestris desideriis ac successibus, à fortuna & scelere oblatam, in lucro & felicitate vestra posuistis? sed de hac re mox plura. Quid alibi, ubi spes aliqua nocendi sese offerebat, egeritis, aut tentaveritis, & sollicitaveritis, quis omnino enumerare vel assequi satis queat? Benedictus ille Schytthius Senator & legatus vester, quibus non demonstrationibus, & persuasionibus, Othomanicam portam, & potentiam pulsavit, ut Poloniam à Cosacis afflictam, laceratamque sibi quoque diriperet, sicque rupto & abrepto illo, quod hucusque antemurale Orbis Christiani habebatur, facilem ad alia aditum strueret insatiabilis illa imperii dilatandi ambitio. Illud autem quomodo non hostilitatis apertæ documentum est, quod Regem Christia-

nissimum huic Regno semper amicum ad eò alienastis, aut alienare contendistis, ut non solum vobis ingentes pecuniæ summas per cambia Hamburgum destinasse, sed etiam minas belli in Germaniam misisse feratur, si quid inde opis in Poloniam contra vos mitteretur, aut concederetur? Hinc metus in Principes omnes immixtus est, ne quis auderet Polonis benevolus, in causa quantumvis iustissima, esse. Optarem quidem hæc vera non esse, partem tamen maximam hujus incommodi jam sensimus, vel extimescimus. Christiani verò Cæsaris aulam provinciâsque quibus non conviciis & calumniis adversus Regem nostrum publice etiam editis, sparsisque & commendatis scriptis, implevistis? Quod si alicubi plus quàm chartas, aut scripturas adjecistis, nemo miratur vos, a jure atque innocentia destitutos, pretiosioribus documentis eguisse egissèque. Alium verò in vicinia Principem quid opus est nominare, per amicitiam mutam, communisque non pridem belli necessitudines, Regi & Regno Poloniæ palam ac gloriose devinctum? Hunc vos Principem taliter nobis per periculorum commodorumque, ac dignitatis mutam societatem junctum, ac veluti pignorum, vos inquam Succi nunquam omisit, defuistis, per literas, tubicines, nuncios, ad conjunctionem belli vobiscum invitare, vocare; ostentando è propinquis montibus, propinquissimam Provinciam, & in prædam offerendo, ne gratis ille ad vos, & ad hostilitatem contra Regem Poloniæ descenderet. Quis insuper alius finis turbati tractatus Lubecensis vobis fuit, quàm ut occasione sumptâ ex Cosacorum rebellionem, & Moschorum successibus, cum tali opportunitate in Poloniam debilitatam, fractam aut distractam irrueretis? Quâ re nihil clarius ac manifestius esse potest; attestatione ipsius Regis vestri confirmante, qui Stocholmiæ post alios discursus, in ipso procinctu, Legato nostro insultabat, se quoque partem aliquam Poloniæ post Cosacos & Moschos rapturum, quandoquidem rapiendi facilitas invitaret.

Venio nunc ad pulcherrimum perfidiæ instrumentum Hieronymum Radziejewium, quem Christianæ Regiæ adhuc tempore
e Po.

è Polonia proscriptum, humanitate & favore singulari, tanquam Hannibalem Antiochus (ut Commissariorum Vestrorum Lubecensium ad Reginam literæ loquuntur) excepistis, in despectum & contumeliam Regis, Patriæque & existimationis Nostræ. Nam & hoc amicitiam inter Principes violare solet, stabilire certè non solet. Vestro id exemplo & cautione demonstrante, qui cum Daniæ Regibus maximo sub piaculo cavistis, ne Dania vestros profugos, proscriptos, reos, tecto aut præsidio excipiat; néve vos illius. Et exprobraſtis Regi Daniæ in Manifesto vestro Anno 1644 Die, 16, Februarii vulgato, Reginam vestram male in Suecia tractatam, humaniter & hospitaliter ab eo exceptam, & adjutam, ut inhumanitatem vestram evaderet. Sed redeo ad vestrum Hannibalem Hieronymum. Quid ille in Suecia vestris favoribus animatus, ideóque se vobis vicissim approbaturus, non machinatus est contra Poloniam, submittendo inde literas ad diversos Proceres, & audacissimo compendio Jassinium famulum suum ad ipsos etiam Cosacos, quibus eos etiamnum ferociùs ac validiùs contra Regem suum stimulareſt concitarétque? Deprehensum verò captumque hunc Jassinium, literasque interceptas, & publicæ notitiæ insinuatæ certè negare non potestis; nam tales ad Cosacorum spes conatûsque altiores concitandos, literas, ubi nisi in Suecia effingi & concinnari potuisse credimus? ubi enim Regis Sueciæ potentia, vires, felicitas, benevolentia, & erga Cosacos imposterum cura, favor, præsidium sic offerri, sic depingi, sic exaggerari, ostentari? aut unde Rex ipse, tam festivè, blandè, pompose commendari, nisi è Suetica & Radziejeviana Cancellaria potuisset? An verò in tractatibus Lubecensibus dicti Hieronymi consiliis, hortatibus, monitis, aut dehortationibus usi sitis, quid juvat conscientiam vestram interrogare, vel aliorum oculos aurésque quodam modo notitiam publicam appellare? Post tractatum Lubecensem quomodo is vel in Suecia, vel è Pomernia, Majoris Poloniæ Palatinos, Nobiles, aliósque in Masovia & minori Polonia Magnates sollicitaverit; literæ etiam ejus in conventibus provincialibus lectæ, aliáque ejus consilia passim prodire.

dere. Hæc certè ante classicum vestrum tentata gestaque fuere, ideoque facile convincunt falsa omnia & simulata fuisse, quæ de Regis vestri etiamnum studio erga pacem, post Tractatus Lubecenses deprædicabas. Deinde quomodo vestrâ conniventia sufflante, vel astutiâ procurante idem Radziejewius, Joannis Kochy, nuntii vestri simulatione, operâ, morâque in hoc Regno longiore usus, atque abusus fuerit, scriptaque & consilia proditoria ad varios per illum missitaverit; & quid ipse denique Kochius, meando, commeando, hærendo coxerit, id tunc non uno loco, modò autem aperta in prodicione nimis manifestè erupit, seque prodidit.

Cum Electore Brandenburgico, Duce in Prussia, Vasallo Regis Poloniae, an præsentem ante irruptionem, clandestina habueritis Succii, cumque contra Dominum suum incitaveritis, post liberum Suetici exercitus, per ditones ejus in Germania transitum, in Poloniam datum concessumque, post tot ejus cum civitatibus & Ordinibus Prussiae machinationes, oblationes, simulationes; postque tam facilem & speciosam transactionem cum Succiae Rege, an dubitationi locus esse potest?

Num verò præterea Ducem Radzivilium, supremum (proh dolor) Exercitus Lithvanici Præfectum perverteritis aut corruperitis, id quidem neque ab ipsius indole & religione, neque à moribus artibusque vestris vehementer abhorret. Credebatur is Cosacos & affinem suum Chmielnicium strenuè aliquamdiu oppugnasse. Nec dubitabatur fideliter fortiterque pro Patria Mosco occurrisse, & arma, viresque publicas seque constanter objecisse, cum tandem, ubi fide ac virtute maximè opus erat, paulatim fida Tribunorum Regionum consilia monitaque refutans, aut dissimulans, lentiùsque ac molliùs Mohiloviam & successus Moscoviticos impugnans, repente vester factus est; non securitatem modò, verum & complicitatem sub vestris insignibus & Aquilâ non suâ indutus; Postremò antequam Patriam prodicione & rebellionem latius obrueret, à furiis obrutus, non absque desperationis manifestæ tormento simul & documento. Hæc omnia &
alia

alia similia , quæ in vestra tot annorum , & molitionum sive semiclanculariarum , sive publicarum officinâ coquebantur , nec semper celare se poterant , antea Polonia quæsta non est , quia Commissionibus Livonicis hujusmodi querelas assignatas esse sciebat , dictarúmque Commissionum fidèi fidebat . Nam quis aut spe , aut mente conjicere potuisset , Succiam tam iniquam , tam immemorem , & juris divini ac humani contemptricem fore , ut Inducias & tempus à pactis constitutum , armis bellóque rumperet , fidemque ita publicam abrumperet ?

Post hæc à me recensita subjunge iam , affunde , multiplica , quæ & qualia , velis , & quæ reticere non possis , cui semper nova &

. . . . *immensa cavi spirant mendacia folles.*

Et vide , ut Thrafonem vel Stentora , vel si quid jactantiùs in Comedia , aut clamosiùs in Exercitu Mycenæo fuit , strenuè agas , dum multa alia contra pacta , fidemque publicam , & contra subditos vestros factitata clamas , sed ea te uberiori declarationi , ex ipsis Actis deducendæ relinquere . Bellè sanè & tempestivè spacium plura comminiscendi , tibi relinquis . Fortassis grande aliquid quod pulmo animæ prælargus anhelet , interim tibi hæsit , quod cum usura postea evomes . Jamque fessum te currendo , terrásque , & maria persultando , vociferando , fingendoque propè credebamus , cum tu plùs quàm declamatoriâ voce pronuntias ? Potuisse quidem hæc à te commemorata , diutiùs inulta tolerare , nisi Rex , & Respublica Polona , crebris Inter-Nuntiorum missionibus , & ostentatione pacis , Succiam toties ludificasset , ac binis Lubecæ tractatibus fucos fecisset , non alio fine quàm ut tempus traheret , & varios in Regnum Sueciæ hostes concitaret , Sicque necessitatem belli inferendi imposuisset Regi Sueciæ .

E ludo & scænâ inimicâ initio prodiisti : Quid mirum si è tabernis fuliginosis , & fumi venditricibus fucum exfugere quæras , quò

Re.

Regem Poloniæ inficias , ipse *stercore fucatus Crocodili* ? Vel ipsæ crebræ missiones Nunciorum , quæ licèt sine fructu , sine sumptu tamen & molestia non fuère , testari possunt animum syncerum *studiúmque* , non *ostentationem* , non *fucum* fuisse , ut tu ostentum hominis calumniaris. Tempore belli Germanici , vos pacis vobiscum reconciliandæ requisitionem , & oportunitatem seposuistis , vel non admisistis , excusationem à bello ipso prætendentes , quamvis illud extra Succiam , & vestros extra parietes ac fundos esset. Rex Poloniæ , cùm in ipsis Regni sui Visceribus hostes ferocissimos haberet , potuisset justiore excusatione rem protelare , vósque vestrà prætensione eludere. Verùm ne sic quidem paci honestæ aliquando acquirendæ defuit , si modò honesti , & æqui aliquid , vel spes æquitatis per tot Nuncios , & ipsos tractatus Lubecenses impetrari potuisset. Sed ego in vestrum fastum ac simulationem , morosè non inquiram , quandoquidem tu Cætera te omissurum & quædam obiter tantùm dicturum *prædicis ac præmones* , quæ docere possunt , quàm parùm animi Regi Regnóque Poloniæ ad pacem perpetuam fuerit; ô graphicum Doctorem ! Sed quænam illa , quæ obiter tantùm dici merentur , ut pro talibus haberi possint , néve tu etiam pluris facias ?

Plenipotentiæ , inquis , à Commissariis Polonicis in primo congressu Lubecensi plurimis vitiis refertæ , adductæ sunt , ubi titulum Sueciæ sibi arrogabat Rex Poloniæ , subruto hocce modo ipso pactorum fundamento. Antea per hunc titulum convelli dixeras , nunc atrociori verbo *subrutum fundamentum* dicis. Sed circa hoc antea fati risus & irrisuses , sic loquendo ; ac præterea opus non erit repetere hîc , & nugas tuas iterum refutare. Nam titulum Sueciæ Rex noster hæreditario gerit jure , eï innatus , eï innutritus , eoque licite ac libere , & sine impedimento semper & ubique ad omnes Reges ac Principes utitur & gaudet ? non subjectus vestris constitutionibus ,
aut

aut iudiciis decretisve à Carolo, Succiaë in vasore, confectis; ut solus sua cum stirpe mascula, non diu duratura, alieno Regno titulóque frueretur. Neque ad omittendum Titulum seu supprimendum dicta in Plenipotencia obligabatur, per illas Anglici & fœderati Belgii legatorum attestaciones, seu copias tantùm nudas & simplices attestacionum, literarumque Zadzikii ad Comitum Brahe, quas tu superius, pro inducendâ stabiliendâque literarum à Rege Poloniaë in Succiam formâ; Commissarii vero tui pari vanitate quem in finem allegârunt, & sponte atque irrequisiti produxerunt? cum ad alium effectum obtentâ & concessâ non sint, quàm ut fidem facerent Sigillo reformatâ Plenipotentiâ appenso, quod circa exclusionem tituli Suetici, & subsequentium Regis Poloniaë titulorum, ejus in locum transportationem, rudiori fortè manu habitum offensumque; certas monstrabat literas, quarum Succi (ne illis probro darentur) noluerunt esse auctores. Reliqua *Plenipotentiârum vitia* merito silentio involvis, quia vel levissima illa, & non nisi scribæ fuere, vel certè (ut in mutuis delictis accidere solet) compensanda cum iis quæ etiam in scitissimis vestris, & oculatissimis reperta sunt. Recordaris enim, quod primis illis in Tractatibus præter controversiam de titulo, quam Commissarii tui coacto illo frigidóque, & clumbi argumento à contextu seu scriptura pactorum evincere conabantur, alia intervenerit nulla. Prout etiam recordari ac fateri debes Commissarios Polonos, quotiescunque iisdem in Tractatibus, per privatos & inallebiles cum legato Gallico discursus, de aliis Plenipotentiis mentio facta est, nunquam nisi clarâ & æquissimâ sub conditione respondisse, missuros nimirum se perlibenter in Poloniam pro eis, quodsi missionis tempore Commissarii Suetici ad ipsum pacis negotium voluerint accedere: Vel saltem ipse legatus, de aliqua exinde consolatione, ac temporis sumptuumque fructu assecurare eos possit. Ad quæ ille Vestrarum haud ignarus machinationum pro rectitudine animi sui, nunquam nisi verba ambigua, & bonam spem offerens, maluit iterati congressus promotor esse, quàm iniquus pro vobis sponsor.

Et jam ego te hîc ubi *obiter* tantùm dicenda quædam promisc-ras, *obiter* etiam expedire poteram, si dicerem Regem nostrum falso à te accusari violatarum Induciarum, tam ob dictum titulum, quàm quia Plenipotentias ad gustum salivæ vestræ non statim miserit, nec ad arbitrium & præscriptum vestrum solum in tractatu agere, aut comparere voluerit. Res & ratio clara est, ex ipsa Induciarum formula verbisque, quæ sic habent : Durantibus ac currentibus hisce Induciis agatur de pace perpetua, ita tamen ut si tractatus pacis perpetuæ semel atque iterum non successerint, firmæ nihilominus & inviolabiles maneat Induciæ, usque ad exitum pactis hisce præfinitum. Manent ergo Pacta à Rege illæsa & inviolata, tametsi se cum dignitatis & honoris sui gratuita jactura repente Vestris dictatis, lituris, correctionibus, reformationibusque subdicere & substernere recusasset. Mirum verò & monstrosum est, quòd cum binæ ad minimùm partes in tractatibus æqualiter agere deberent, vos tamen Succos solos utrasque partes implere voluisse, nihilque admittere, nisi quod limâ vestrâ limatum, vestrâ securi edolatum esset, Alteri pro suo commodo & honore nihil indulgentes, nihil reliquum facientes : Ipso Leone *Æsopico* injustiores, qui ferarum rex, aliquid tamen prædæ feris aliis relinquit. Deinde Suecia & tu ipse *Causaric* profiteris : *Causam* Unicam tam diuturnæ litis, & antea hostilitatis ac belli inter Sueciam & Reges Poloniæ fuisse, Titulum Regni Sueciæ. Hæc lis nonne belle finita esset, Succisque palma tota, & quicquid hucusque verbis votisque omnibus optaverant urserantque, ac bello petierant, concessum videretur; si Rex Poloniæ titulum suum hæreditarium, gratis & ante omnem congressum vel tractatum, antequam omnem spem, atque specimen pacis, deponeret, dele-ret, & Succorum potestati atque arbitrio traderet? Sic enim Succo toto suo desiderio, voto ac fine potirentur, nihil verò inde Regi Regnòque Poloniæ commodi accederet, cum neque fiduciam

aut speciem felicitis vel benignioris tractatus ac successus ut promitterent vel annuerent Succis, induci potuerint. Talis verò successus seu eventus, non à casu, fortuna, aut ab alia incerta alea, neque ab alieno arbitrio, aut facultate pendebat, sed in sola Succorum voluntate, ac synceritate situs erat. At in Prussia Vladisläum deposuisse in diplomate seu Plenipotencia reformatam titulum Succiaë fortassis dices? Sic tamen non jus deposuisse, neque successori suo hæreditario, atque eadem lege, quâ ille, & nullo ejus beneficio ad veram Regni Succiaë successionem venienti, hoc factò suo necessitatem imposuisse, dicere potes? si dicere perges, malignè & falsò dixeris. Ni fortè fateri velis, quod Vladisläus non nisi præmio & mercede receptæ Prussiaë id fecerit, aut facturus esset; Nunc verò quid Succi Joanni Casimiro præstare parati erant? nihil, inquires, qui ne benevolam quidem ullam ostentationem, vel indicium ostentare voluere. Imò verò si votis Succorum altioribus & cupiditatibus sese prodentibus, vel secretioribus rumoribus credendum erat, Joanni Casimiro, Prussiaë vel partem, vel littora, certòsque portûs cum vectigalibus, aliâque plura, illos adimere velle, plus quàm rumor erat. I nunc, & dic, aliàs observatum esse titulos fuisse depositos. Scilicet hoc modo, his conditionibus, quales à Succis Lubecæ coquebantur. Et de his fatis.

In secundo Lubecensi congressu, quia jure non potuisti, jam non quereris de Plenipotencia: scripta enim erat, licet non secundum obrusam à vobis per legatum Gallicum formulam, sed ad normam Vladislavianæ seu reformatæ, & quam vos prioribus in tractatibus voluistis habere. In sigilli tantum amplitudine Insignia Regni Succiaë impressa, contra quam paci congruens, & testimoniis Zadzikii, Cancellarii olim Regni Poloniaë, legatorum Angliæ atque ordinum Belgii satis superque constabat, arguis.

Et cum per insignia Regni Succiaë impressa hîc intelligas, tres illas coronas, quas Commissarii tui, lincæis suis & belli causas

conquirentibus oculis , nunquàm hæctenus , neque in ipsa nuper Vladislâi seu reformata Plenipotencia ab aliis accusatas inter Provincialia Regni Poloniæ insignia , modò primùm observârunt ; quæro tres istas coronas propria Sueciæ insignia esse , numquid non , vobis Suecis toties domi forisque , ac postremò solenniter in Stetinesi transactione Anno M D L X X Dani palàm negarunt , cum quibus ea de re tunc lis erat ? certè non negarunt solùm sed denegarunt , imò palàm evicerunt , & obtinuerunt , nè tres coronæ , certa & propria insignia Sueciæ haberentur , idque testibus ac veluti confirmantibus Cæsareæ Majestatis , Regum Galliæ & Poloniæ , nec non Electoris Saxonæ legatis , ad transactionem illam utrinque electis & assumptis . Nihil profectò contra hæc tunc Suetici legati , quamvis instructissimi , & frustra pro dictis coronis obstinatissimi , probare vel evincere potuere . Deinde Dani , juxta Danica & Noruegica aliâque sua insignia tres coronas , an non hodiernum usque in diem publicè habent , gestant , atque ostentant ? Neque vos in postremis illis Bronsebroënfibus tractatibus tres Coronas , tanquam vestras repetiistis , aut Danis eripuistis , quamvis partem litoris Danici & OEscliam ademeritis ? Nec aliàs in Dania usquam magis , quàm in Polonia illæ tres coronæ alicui certæ Provinciæ assignari vel applicari possunt , atque ita frustra hoc Polonis objicies : Dani verò tum temporis Suecis etiam exprobraverunt , & ex magno illo , (si Diis placet) Suecorum historico Olâo ostenderunt , vetus insigne Sueciæ non tres Coronas , sed puellas nescio quales fuisse . Quod autem congruens paci non fuerit ejusmodi coronarum in sigillo Polonico existentia , nullatenus probari potest . Nedum verò ex literis Zadzikii seu attestationibus Anglici & Fœderati Belgii legatorum ; quia istæ (ut paulò antè dictum est) & si nudis atque simplicibus chartis credendum , ad nullum alium effectum , nisi ad evitandam corrupti sigilli suspicionem à Commissariis illius temporis obtentæ & impetratæ fuere . Si verò is vel alij legati (mirum enim est , quod non omnes) aliquod testimonium taliter compositum , vel conflatum , aut in vim inviolabiliter observandæ legis

Olii
magn:
lib: 4
Cap: 24
Jo: Iâc:
Pont: io
Chorog:
Dan:
pag: 690.

legis dederunt, vel dare potuerunt, idque authenticæ & legitimæ auctoritatis esset, quis tale aliquid vidit? aut unde Regi vel Cancellariæ nostræ constat; Si apud vos Succos solos hæc mysteria clausa & abstrusa sunt? Et Commissariis Polonicis Lubecæ, præter simplices schedulas, monstrastis nihil. Sed quicquid sit de proprietate trium coronarum, cum eæ tamen aliorum, utpote Colonix Agrippinæ, & Cracoviæ Canonorum Cathedralium Collegii insignia sint, cumque præterea pars altera vulgarium insignium vestrorum unus aut geminus leo inter Provincialia Regni Poloniæ insignia deprehensus non fuerit, poterat sanè minus turbarum hæc res concivisse, præsertim cum antea à vobis vestrisque nihil horum in disceptationem tractum, sed tam in reformatæ, quàm priorum tractatum Plenipotentix sigillo, tres istæ Coronæ admixtæ & receptæ fuerint.

Interea autem Polonis Commissariis multoties se offerentibus, quod si istæ tantùm coronæ ad tam operosè institutos tractatus obstaculo essent, procuraturos sese apud Regem suum, ut deprimendi eas seu expungendi sibi ex sigillo potestas fieret (ita enim & cum titulo Suetico fecerant, ne vobis implorandarum iterum attestacionum necessitatem adferrent). Cur vos tam synceri perquisitores pacis non acceptastis hanc illorum submissionem? sed arrogantissimè institistis, ut non tantùm delerentur unà cum titulo de sigillo, sed ut ne vestigium quidem in illo superesset cujuscumque, & novum omnino ac recens conficeretur. Quod herclè impossibile fuit, & consequenter Vestra de expectando & prolongando ad hoc tractatum tempore exhibitio & promptitudo, elusoria magis quàm sincera erat. Mutatio enim sigilli ægre absque Comitibus generalibus fieri poterat, & Rex bello Cosatico adstrictus, supra ducenta miliaria Germanica Lubecâ distabat, in Russia; ubi nulla omnino neque citius neque tardius conficiendi, transferendi verò valde incerta media erant, nisi forte Laponici vestri tabellarii seu cursores adessent, vel talis faber, qualis erat is, qui nocte unâ arma integra Achilli mirificè fabricavit; qua in re nemo fidem haberet Homero, nisi fabrum Deum finxisset.

Porro dum iidem Commissarii præfixum tractatibus bimestre, artificii vestris, modo per sigilli criminationem, modo per disquisitionem, de loco & ratione congressûs eripi sibi animadvertent, invitaréntque vos ad practicum in Prussia tractandi modum: Videlicet, ut quandoquidem de plenitudine & potestate ipsorum nullum adesset dubium Plenipotentiæ cum reliquis differentiis suis, apud mediatores deponerentur; cum assècuratione, quod bene ac prospere cedentibus tractatibus, tales vobis pro conclusione allaturi essent Plenipotencias, & tale sigillum, de quali in ipsa tractatum serie inter vos convenissetis. Sic inquam invitantes vos, & suspensis præliminariis vanitatibus, ad ipsum pacis negocium vocantes Polonos, cur ad meditationes seu vexationes vestras Monasterienses conducere adlaborastis potius, quàm sequi exemplum, ad sopiendam Luctuosam hanc controversiam à vestrismet Commissariis prudentissimè inventum, usitatum, adhibiturum, & tot exterorum Legatorum auctoritate probatum? Fortè quia Succia & patrius mos vilioris momenti & exempli iam apud vos erat, postquam in Germania didiceratis peregrina sectari, & magni atque insolentes esse; & inflari cœperatis potentiâ ad novas Plenipotencias. Sed utut est, quandoquidem vos ad domesticos & rectos mores, neque antecessorum exempla, neque æquitas & ratio, neque instantissimæ Mediatorum suasiones revocare valuerunt, & tam publicè quàm privatim, nullum unquam justæ ac honestæ pacis indicium edere voluistis; Quid aliud Polonos decuit, quàm hujusmodi contumaciæ & arrogantia vestræ se non substernere, sed causam suam justissimam felicioribus committere temporibus, assècuratos vestram adversus perfidiam sanctitate, fide, & religione Pactorum, nec non confecto prioribus in tractatibus limitationis Instrumento, quod isti, de quo agimus, congressui binos menses statuerat, & illis infructuose præterlapsis, liberum cuique, omni sine alterius partis offensa seu violatione Pactorum, discessum.

His non obstantibus tu concludis. Hæc præliminarium morâ Suecos impeditos fuisse, quò minùs de violatione Inducia-

duciarum queri possent, & satisfactionem exposcere. Sed quoties repetendum & refricandum est, quod licet *in tractatibus pax concludi non posset*, *Induciæ tamen deberent esse inviolabiles*: Si inviolabiles, quod vobis Suecis querendi jus supererat? Nam si ad innocentiam satis est querela, quis post facinora omnia atrociora non innocens erit? Si itaque *Violatio* nulla esse potuit, quam ob rem satisfactio exposci poterat? An Sueticum merè est injurias inferre aut fingere, & *Satisfactionem* exigere? Pomeraniæ legitimi hæredes, si liceret, meritò queri possent, & Dani, & cuius antea erat in Bremensem, aliósque Episcopatus ac civitates. Et sic interim tibi de his satisfactum esto, qui ne hoc quidem merebaris, apud quem

. . . *Nullus verbis pudor aut reverentia.*

Post tractatus verò Lubecenses quid producis? quid astruis? Regem Poloniæ per Canesilium indicasse, velle se legatos suos Rëiq: publicæ, ad Sueciæ Regem ablegare, qui coram ipso tractatus de pace perpetua auspicarentur, huncque ad hoc quamvis non obligatum posthac ad reassumendos tractatûs, cum semel atque iterum frustra tentati fuissent, consensisse; eâ tamen lege ut Polonici legati properè accederent, qui tamen condicto tempore non accesserint, sed tantùm Inter-Nuncius quidam Morsternius &c. Multa hîc simul iterum conturbas, Causarie, assuetus fortè non nisi turbidâ piscari aquâ. Num verò *obligatus* Rex vester fuerit novos congressus admittere, ab humanitate Suetica non severè requirimus. Nimis enim dura illa, & montibus suis similis, vel fugitiva est, quæ adeo properè evanescit, ut mox patebit.

Et certum imprimis est Regem Poloniæ per Canesilium nunquam clarè & expressè indicasse, velle se legatos suos in ipsam usque Sueciam ablegare, sed si Lubeca ampliùs non placeret, Francofurtum ad Oderam, vel Regiomontum, vel denique etiam Rigam, aut Stetinum: Rex autem vester quid? Stocholmiam

pro-

properè accedere jussit. Hei *ut subito*, *ut properè*, *ut validè* tonuit !
 Certe satis pro Imperio cum Regibus. Unde verò illa *properandi* per mare in Succiam facultas, iniquo aut dubio tempore, vel rebus interturbatis, erat ? An tanquam in trivio prostant in Polonia legati ? aut è figlino genere sunt, qui currente rotâ, quolibet è luto effingi possint ? Non habet tales Senatores scruos Polonia, quibus omnis nutus Regius pro obsequii necessitate sit, quomodo in Succia ajunt omnem sibilum Regium, jus Majestatis, & imperii necessitatem habere. Quærendi hîc, eligendi, ambiendi, & si novi fuerint, instruendi sunt, quod sine dubio *properè* & raptim fieri non potest. Neque enim illi priores statim ad manum erant, aut adesse tenebantur, Et iam propè cælum hycmare incipiebat, neque genio nostro, vel naturæ Poloniæ mare familiare est, vel idoneum admodum.

Deinde non ideo missus est *Morstenius*, ut tanquam legatus in negotio principali jus & auctoritatem tractandi, statuendique de pace perpetua haberet, vel proponeret, sed ut pro legatis, qui non eâdem celeritate procurari & advenire poterant, de commoditate loci ad tractandam certitudinem aliquam & securitatem, à versatilibus consiliis artibusque Sueticis cognosceret & impetraret; ne despectui nova legatio obnoxia foret, prout postea quodammodo Regio legato contigit. Hoc itaque *Morstenii* factum, nihil alienum à moris publici humanitate afferebat, neque is tamen nisi per magnas molestias & pericula atque jactationes in Succiam reperere potuit; primò Rigam usque circumiens, deinde tempestate, & quasi naufragus in Danica ejectus littora. Interim legatus solennis Illustrissimus D. Zorayshi Castellanus Kioviensis paratus instructusque erat, jamque comitatus, impedimenta, currus expediti ornatique; cùm in ipso valedicendi actu, heu! lethali impetu, subitæ & incurabilis ægritudinis oppressus extindusque non Regia tantùm & publica vota, ac legationis *properandæ* promptitudinem, sed etiam vivendi facultatem destituit. Cerrè si homines estis Sueci, humanis casibus (sepositâ interim durâ & montosâ illâ indole) & tam miserabili fato ignoscere possitis, cùm
 homi-

hominem & legatum ad nos *properantem*, mors *propera* nimis in loco fixisset. Post hæc verò, priusquam nuntius mali ad Regem usque perveniret, antequam alius legatus in tanta locorum distantia quæreretur, inveniretur, iterumque novis literis mandatóque ac sumptibus instrueretur, An non morâ opus erat? aut quomodo *propere* hæc talia peragi, aut *properari* poterant? Quicquid tamen consiliò curâque ac diligentia perfici poterat, curatum, factumque & perfectum non lentè est: Missusque pro ratione temporum alius legatus Illustrissimus D: Joannes Comes de Leszno Palatinus Lanciciensis, cui post mare enavigatum, ad portum Sueciæ Dalrensem appulso, statim succensuit hospitalitas Vestra, quòd nauscâ tarde discussâ, primùm triduo declinante, inter homines ignotos, & cò locò, ubi non omnia more cultiorum ac civiliorum Regionum parari poterant, misisset sui adventus indicium. Deinde illi ipsi, jam Stocholmiæ Vestræ appropinquanti, non excendere & evadere è navi, neque terram attingere fas esse voluistis, nisi è Sentina literas fidei prius monstraret, sèque legatum probaret. Quod tamen ab aliorum legatorum civilitate admoniti, humaniter scilicet, remisistis. Quomodo verò illic cum legato egeritis, quomodo is ad omnia, votis formulisque & conditionibus vestris se frustra accommodaverit, nullamque jam moram vel excusationem reliquam vobis fecerit ad pacem tractandam, omniâque effugia vel diffugia vestra, facilitate simul suâ ac Regiâ nudaverit ac discussit, vobis nil nisi bellum & patrum violationem libere ac minaciter spirantibus, & illum hinc aliò ac rursus trans mare ablegantibus, ubi tamen antea tractandi facultatem concedere, aut constituere nolulistis. Hæc inquam omnia, & si quæ alia superbe frustrando illata ei sunt, quia frustra vobiscum nunc agitur, hîc non exaggerabuntur.

Interim Morstenius ille quidam, prout à te appellatur, penè mihi excidit, postquam à vobis spreus & contemptus est: In eo *litteras* fidei non in capite, neque in essentialibus, sed in calce litterarum reprehendis, & in iis accusas ea, quæ nihil ad rem faciunt, sive in fine litterarum ponantur, sive nusquam in quibus

tu tamen audaciam & auctoritatem juris ponis, quod nisi impudentissimæ suspicioni, aut fictioni potius liceret. Sed quid tibi non licet, qui etiam Literas fidei datas Morstenio à Rege Poloniæ *insimulas*, illud præjudicii involventes, ut sub annis Regnorum suorum, (cùm unum tantum videlicet Poloniæ habeat) ad calcem literarum annotatis, innueret, se esse Sueciæ Regem, titulumque illum Sueciæ, quem in fronte literarum Regi Sueciæ ex pactorum præscripto tribuisset, esse frustraneum & inanem. Hic non puduit te iterum pactorum præscriptum appellare, quod toties nullum esse ostensum est. Fateris autem, *Regem Poloniæ in fronte literarum* Regi vestro tribuisse titulum Sueciæ, quò illic ipse nominatim clarèque abstinuit, Frons autem literarum, an non is locus est, in quo Reges se suosque titulos profitentur, eosque expressè præmittunt, & cum dignitate exponunt, non verò in cauda; nisi fortè apud vos cauda calxque preciosior atque honoratior sit, quàm caput & frons. Tardè certè & præposterè se Regem Sueciæ Joannes Casimirus, absque mentione Sueciæ, & eo in loco, ubi nihil ampliùs nominabatur, *innuere voluisset*, (ut tu calumniaris) si post depositum, palàm publicèque *in fronte* & capite titulum Regni, illum demum in calce, & veluti sub pedibus, tacite, sine nomine, sine indicio omni reservasset. Verùm tibi non lyncei tantùm, sed etiam vulpini & Crocodili sunt oculi, adeò astute vides, quæ nemo alius videt: Nam & Crocodilus non habet oculos ad lachrymandum; nisi ut decipiat & noceat. Neque tu tamen antice & postice Jane, in illo literarum veluti postico (condonabis verbo inopinato) aliquomodo innuis, simul cum Polonia, aut juxta illam in nomine suo Sueciam scriptam aut nominatam fuisse. *At Regnum Poloniæ inquis, Unum tantùm habet Rex*: si veteres titulos inspicias non unum semper fuit, & post Christianam disciplinam acceptam adhuc plura fuere, interque Reginas harum terrarum sanctiores, illa Italicæ Regina, hodie

hodie publicâ memoriâ & veneratione honoratur. Facile verò pro tua, aut synceriori humanitate agnoscere potuisses, non regium consilium, stupidissimum illud compendium & figmentum à te illic productum potuisse esse: scilicet ad *pronuntiandam frustraneam* & inanem priorem illam in *fronte* expressam & professam contestationem depositi sigilli, fuisse postea suppositam vocem non exprimentem quicquam clarè & nominatim. Scribam autem vel Actuarium, non eximo omnino culpæ aut discordiæ, præsertim (ut hoc non diffitear) cùm Cancellariæ Polonicæ scribas non semper eruditionis commendatio eligat admittatque, sed mera plerumque Characteris vel pingendi qualiscunque industria, manúsque specimen assumat. Neque Reges scribendo nomen suum illic, vel annos suos numerare, vel inspicere solent: Et nostrum aliquis, cùm literas scribis describendas tradit, quando postea relegendo ad vocolam illam *Datum* pervenimus, oculorum & correctionis diligentiam amplius non extendimus. Tam suspicacem autem & malevolam tuam diligentiam & fingendi industriam quis sperasset? nisi quod ubique nodum in scirpo quæras, quem tamen nullum esse, ipse Junceus, Regiæ apud vos domus, fasciculus monstrare posset.

Sed & aliud quiddam te *in literis fidei*, emissitiis tuis oculis, Arctoa è latebris ulula deprehendisse ululas, simulans tamen, illud te omittere, & transire silentiò. Nescivissimus te esse tam Rhetorculum, nisi figuram Rhetoricam ab ipsis Atticis Athenis, ubi noctuarum est patria celebris, tu Borealis noctis incola, tam bellè ascivisses, ut quod maxime dictum expressumque ac clamatum velles, *silentiò* te transire nugareris. Sed neque ego tibi Transitorio homini, nisi per transennam aliquid regram, qui solam vocem & *cæterationem* iterum atque iterum a Latinis Regis literis exigis, cujus unius omissionem *derogare paritati Regum*, transeundo tantum insimulas. Sed mane sanè Nam hoc quoque neque consilio, neque studio factum; satis vobis constabat, quod cùm scribæ simplicitati aut vitio, ommissio fortuita assignari potuerit, ultrò aliæ, & quales Suecia voluit, literæ transmissæ fuerint; La-

tinè certè confectæ , & tam clarè ab eo, qui cum Regna, Ducatûs, Provincias, & hæc atque illa omnia, simulque & cætera scribi fecisset aut concessisset, satis universa ac singula pariter concessisse credi poterit. Vis tu hoc, clarissimo & proximo in exemplo? Siquis te Oratorem, causidicum, historicum probum & cætera improbum diceret, an non omnia improbitatis elogia tibi attribuerit? aut quidpiam postea probitatis tibi relictum putas? etiamsi tu Excetrâ Iernæâ, & cætô Atlanticô, vel balenâ Britannicâ major, te intus & intimè exenterares. Quantò modestiùs graviùsque Angliæ semper & hodie Galliæ Reges cum titulis suis agunt, qui nullam cæterationem quærunt, vel usurpant ipsi, aut ab aliis exigunt, etiamsi plures Principatus in Regnis suis numerare queant, & nobiliores quàm Suecia, sed tu nimis

. . . *Vis Archetypas habere nugas.*

Jámque ego te nescio quo, cum tuo silentio transiisse putabam, cùm tu præcipiti anhelitu regressus, præcipuum quoddam, sed novo horrore terrificum, incertum quo ex mari producturum te minaris, verebar ne illa esset, quæ Hætionem devoratura quondam visa est

. . . *repens consurgere ponto
Bellua monstrum ingens, quam tu nec montibus ullis
Nec nostro metiri*

posses mari. Hercule hîc fortè opus est ut olim contra illam; Magna certè monstra fuisse necesse est, quorum dentibus plûs quàm Elephantinis, jugulum ais Sueciæ, Regem Poloniæ petiisse. *Et quænam illa?* Peregrinas, inquis, classes in mare Balticum Rex Poloniæ inducere est conatus; fœderaque cum variis Principibus ac populis, qui dictum mare accolunt ac frequentant, inire, solo Sueciæ Rege excluso; & ne cæci non viderent; adjecisti, luce meridianâ clariùs esse, dictas classes adversus Suecos fuisse destinatas. Quod si *meridianam* hîc lucem, illam viciniæ vestræ aut

Lapponiæ intelligis, festivè tibi credimus, ubi hyems & nebula perpetua

*Involvens umbrâ magnâ terrâmq; polûmq;
Semper, & obtentâ densantur nocte tenebræ.*

Cur verò nullus Rex aut populus *in tanta luce* nominatim & specificè ostendi potest? Nullus locus aut tempus certum exprimi? *Non ita pridem* hoc factum ais; At tu jam pridem mentiris, præsertim cùm nihil nominas. Qui deinde illi *varii sunt Principes & populi mare Balticum accolentes*? qui classes habent, ut ad nutum Polonorum contra *Sueciam* mittere possint? unus Regum, Daniæ Rex ejus maris est accola. An ille *Ipsè Mycenæus magnorum ductor Achivûm*, mille navium classem, tanquam ad Trojam expugnandam sollicitatus est? Si ita est, illo vivo die eundem sollicitatum esse, ut tibi testis adesse possit. Qui verò alii sunt, qui quidem Balticum non accolunt, sed frequentant, Britannos vix credo te intelligere; causam meliùs nosti quàm ut audeas fateri: Ordines fortè fœderati Belgii aptiores sunt & paratiores. Sed quæso te, quâ spe, aut quibus sumptibus, hoc cogitare, aut suscipere Rex Poloniæ isto tempore potuit? Ajunt quidem tempore tractatum Lubecensium, aut circiter, rumorem quendam incesse; sed nullo Rege, nullo ordine auctore; E re fortè negotiationis magnæ, ac fructuosæ esse potuisset, si Polonica societas adjungi posset maritimæ cuidam societati. Sed unde Polonis aliqua in mare fiducia, aut vires? Nec tamen hic rumor aut inane votum, ad publicæ vel Regiæ auctoritatis noticiam seu consensum unquam pervenit. Sin aliter se res habet, dic per legatos, vel per literas, vel per indicia, Regem ullos sollicitasse, ne semper fingere videaris. Si verò societatem aliquam foris Rex quæsvisset, vel oblatam admisisset, An à more hoc aliorum Regum alienum, aut omnino illicitum erat? Aut vos Sueci soli homines estis, quibuscum societas iniri debeat aut possit? vel contra quos fœdera sanciri queant. Nimiùm estis, si nullus alius Rex aut populus præter vestrum est: An nusquam mundus, amicitia, & genus humanum, nisi in Suecia viget & latet? Aut si Rex Poloniæ aliquem amicum Regem habe-

re vellet , ideo subito contra vos amicitia illa , per insidias aut cuniculos , vel aperta pacta strueretur ? Vos in Britannia forte societatem iniistis; nunquam in vestra consilia aut facta inquisivit Polonia. In Lusitania simul atque Rex novus erupit , vestra legatio occasione abblandita est, Sueticæque amicitæ blandimenta attulit. Nec illic quidem sinistri aliquid suspicata est aut quæsta Polonia. Et heu quid non in Gallia perfecistis aut tentastis ? Ut de Moschis interim taceam ea , quæ seipsa produnt . & orbi jam manifesta sunt universo. Quid Benedictus Schyrtius Senator & Legatus Sueticus in aula Turcica sollicitaverit, quis dubitare potest ? Solis ergo Suecis trans maria terrasque omnes Regum sollicitare potentias vel societates licet ? Solis Polonis interdictum est , vel unum amicum , aut non nisi ad arbitrium vestrum asciscere , vel admittere invitantem ? aliàs diffidentiam vel hostilitatem vocatis. At solum *Sueciæ Regem à Polonis sic excludi* molestè fers , aut minime ferendum putas. Et vos ubinam usquam Regem Poloniæ in societatibus tot vestris inclusistis ? *In pace quidem Germaniæ id fecistis*, sed ut turpius per injuriam excluderetis , bellum sic quoque inferentes , contra Fidem publicam , Nam vestram ubi appellem ?

Post hæc de maris Baltici & commerciorum turbatione à Polonis quæsitâ , pudet tecum litigare : Nam Suecorum hoc proprium est & peculiare , prout non solum Caroli sed & Gustavi tempore , luce meridiana propiori constitit , & nuper emicuit in portu Gedanensi ; ubi Vrangelius , & alii cum classe Suetica, vectigalibus exigendis , & sic libero commercio turbando insidiabatur , solum ita per literas , à nobis interceptas , jussus à Rege vestro rem moderari , ut si Danus & Batavi , pro libertate navigationis, vim opponere vellent. Vrangelius exactione abstineret , si modo nil dum tale agressus fuisset ; sin jam ad factum ipsum processisset , pergeret porro & non desisteret. *An verò tutela maris Baltici Suecis peculiaris sit*, credo nondum cum Rege Daniæ decisum esse , qui non frustra sibi vectigal in freto Orensi constitutum & consensu gentium approbatum asseverat , atque defendit.

Et

Et hucusque causas omnes enumerando, virus tuum, araneole Suetice, evomisti; quæ cum sic nil nisi tela araneosa fuerint, eas muscæ cujuscumque sclopus posthac facile difflexerit. Ita tamen tu pro te, proque tuo Rege; pro Polonis verò objectionem unam, alteramque vel etiam tertiam invitus quidem affers, sed & invitâ Minervâ mox impugnare & evertere conaris.

Prima est qualem ipse informas & mox deformas. Quod Poloni controversias exortas, per Commissarios in Livonia non per arma decidi debuisse opponant. Meritò id quidem, quando ita & non aliter statutum ac præscriptum & licitum esse ex pactis constat. Contra hoc tamen sic reponi posse ais. Interim satîs molliter hoc posse dixisti; nam solidè *reponi posse*, dicere non potuisti. Quid tamen robustissime Gigas per potentiam tuam potentissimam, è calumniarum reposito *reponis*, qui hucusque nihil validi, nihil firmi posuisti? Per Commissarios, inquis, in Livonia nihilò plus obtineri potuisse, quàm per binos Lubecæ solennes conventus, nec spem fuisse decisionis controversiarum per Commissarios, quando Lubecensi bino congressu, nè præliminaria quidem pertractari poterint. Hæcine contra sacrum & inviolabile pactorum repositorium, supposititæ promeconde, reponis? sicque pacta eludis, quæ unicum hunc modum Regibus Regnisque servandum, expressis verbis & legibus assignârunt, indixerunt. Indixisse, certè negare non potes, servandum ergo hoc erat, non mutandum, non rejiciendum, nisi simul pacta rejicerentur: Et non servando vos Sueci soli infregistis, soli violastis pacta. Commissionum enim illa non solùm natura, sed & necessitas erat, ut Tractatum & belli facultatem præcederent, quo igitur jure à bello incepistis, commissionibus non habitis & Induciis durantibus?

Extrema primo nemo tentavit loco

Nisi extremè perditus aut inhumanus.

Priùs in Commissionibus de violatione pactorum agi jussere
pacta,

facta, factum à Vobis non est, non permisere antè ad arma descendendi, factum id tamen à vobis est. Malè itaque imò malignè, à tractatibus ad Commissiones ratiocinarias Causarum. Nam in his nullam de pace perpetua tractandi facultatem, aut necessitatem posuere facta, & sic non par moles aut difficultas fuisset; frustra ergo argutaris. Nec præliminaria quidem moram, vel obicem ullum opposuissent, atque ita facilius res transigi potuisset, quàm illic, & non alibi; multò minùs in acie & bellò agi & peragi de pactis violatis debuisset, clarè facta jussere. Suetica ergo hæc fraus aut tergiversatio, non Regis Poloniæ erat, cui tu toties falsa imputando, moras, ludificationes, fucos fucosissimâ fronte assignas.

Secundam objectionem, quia clarissimam & validissimam invenisti, novæ lubricitatis astu & fallaciâ anguillâ Sueticâ seu Amphisibenâ exoticâ cludere tentasti. Licet enim semel iterumque tractatus pacis non successissent, firmæ tamen & inviolabiles Induciæ, usque ad tempus pactis præfinitum debent manere. Hæc verba sunt pactorum, & talia ipse clarè expressèque producis, quia aliter non licuit. Tu quid ad hoc? Rex inquis, meus nihil in his pactis præsidii habuit, ideo ad arma decurrere debuit. Imò *currere aut decurrere* non debuit, quia facta vetant. Firmus itaque atque immobilis, & pactorum observans manere, & tempus præfixum expectare obligatus erat, nec aliud ei *præsidium* interim, vel ante illud tempus necessariò præfixum permittebant; quia unicè cavebant, & prohibebant, ne priùs ad arma decurreretur. Itaque non aliter pactorum auctoritate uti potuit, quàm illa permittebant; nisi si jam spernebat auctoritatem, quæ non concedebat illi undecunque, nedum pactis violatis, præsidium aliud arripere.

Et jam hîc deprehensus tenebaris, ut tamen erumperes, omnia simul rupta effingis. An forte aliqua Principalis arx Succiæ.

. . . *procubit subito & cælum tonat omne fragore.*

Cùm

Cùm scilicet Priores Pacta violarent Poloni, quo nunc figmento effugere & elabi tentasti? Contractuum & pactorum rationem hanc esse, ais, ut cùm mutuâ stent obligatione, ubi ab altera partium violata sunt; altera partium se non teneri ulterius pactis putet. Putet tantùm? poteras firmiori verbo uti, si quid firmi habuisses. Putet certè ratio, quæ nihil purum putùmque habet, & tota causarum enumeratio apud puros synceròsque Judices, quid nisi

. . . *Tanti est, quanti est fungus putidus?*

Cùm verò toties Polonos, seu *Regem Poloniæ violasse pacta* insimulas, interimque ne semel quidem aut unum aliquod evidenter ac solidi probaveris, quid te nisi toties mentitum constet? Actore autem nihil probante, quid jura statuunt ignorare non poteras, aut non debebas. Pro probatis ergo, quomodo à probis recipienda sunt? Et quoniam per singulas causas, ne quid omitteretur, tecum itum est, & sigillatim omnis accusatio tua circa pactorum violatorum figmenta, in nominibus ac particulis suis, ventilata & discussa est, Æolum hîc & ventos alios ad eam difflandam non opus est evocare.

Tertiam Polonorum objectionem sic levissimè producis, ut tantò levius evadas. Prædicta verba semel iterùmque non pro binis vicibus accipi debere, sed pro pluries repetitis, eoque ad tractatus non ad arma descendi oportere. Sed quid refert, an pro binis an pro pluribus vicibus intelligi debeant voces illæ, *semel iterùmque*? Nam tametsi non bis tantùm sed etiam decies non successissent, pacta nihilominus decrevere, ad arma descendi non oportere. Si non ad arma, quid nisi vel ad tractandum, vel ad tractatus renovandos descendi debuisse? vel certè quiescendum ab armis usque ad præfinitum tempus, tenor pactorum decernit? si prius illud negaveris, hoc posterius certè nisi furiâ furiosior sis, negare non poteris. Tu tamen qui tantùm numerare malè scis, postquam vovulas semel iterùmque, pro

binis licitis vicibus accipis, addis, pluries quàm bis convenire, contra sensum pactorum esse. Ita cùm malè ipse sentias, parvam hanc sensus tui sentinam, aliis quoque offundere conaris, qui tamen id, quod expressè vetitum esse non probas, pro expresso ponere non debuisses. Dictum verò tuum sic tueris. Ideo plùs quàm binum congressum, contra sensum pactorum esse, ut necessitas partibus imponeretur absolvendi negotii, ne irritus & repetitus sæpius congressus mentes exacerbaret, & pariter omnium gentium ludibrio exponeret, maximarúmque impensarum causa esset. De ludibrio piget aliquid movere, cùm florentissimæ & potentissimæ gentes sæpissime congressus repetierint. Sed nec ulla tam splendida, aut sumptuosa est natio, quæ non celeriter finiri tractatûs & controversias optasset. Neque tamen verum est, *pacta necessitatem non pluries quàm bis congregandi*, simpliciter & inviolabiliter præfixisse, aut non permisisse renovari tractatûs, prout superiùs demonstratum est, & ratio clara dicat. Quia licèt semel iterúmque non convenisset, inviolabiles tamen debeant ab eo tempore, usque ad ultimum definitum tempus permanere Induciæ. Hæc sola unicáque & inevitabilis est necessitas, quàm pacta decrevêre.

Post hæc leoninæ pelli bellè vulpinam particulam assuis, & lectori blandiendo Regis tui ubique nunc cruenti, studium ad pacem perpetuam commendas. Eum nempe, post illa omnia quoque in tractatum amicitix perpetuæ consensisse, eâ conditione tamen, ut legati Polonici pro spe, à Cancilio facta, nullâ interpositâ morâ properè advenirent. Sed de hac propera properatione, jam tibi suo loco properè & propriè responsum est.

Post omnia verò quænam tandem tibi

. . . *magna malæ superestaudacia causæ?*

Orbi inquis, Christiano, ex his omnibus liquidò constat,
quàm

quàm justum Regis Sueciæ contra Polonos bellum sit , & quàm necessarium. Verùm enim verò & hanc liquiditatem antea jam discussimus, quæ nil nisi nebula, aut fucus, aut mucus fuit. Et Si ex illis justum Regi tuo conflatum fuisse bellum ostendere potuisses , non ad furorem statim ab initio confugisses , quem illi pro clypeo induisti. Necessarium autem Regi tuo fuisse hoc bellum ad antevvertendas perniciosas Regis Poloniæ machinationes quod adstruis : Si illas machinationes intelligis, quas hæcenus enumerasti, cùm eas mera figmenta & calumnias esse sigillatim ostensum sit , novam hîc refutationem non merebuntur. De alia *necessitate* Regis tui aut militis sui non libet ex rumorum vel claritate , vel ambiguitate quicquam vobis exprobrare. Scilicet an necesse fuerit , militem Sueticum inquietum , stipendiorum egenum , aliò ad prædam & spolia effundere, cui quasi alendo ac sustinendo , nec Suecia , nec Pomerania , & quicquid præterea habetis par erat. An verò id in Poloniam licuerit , fati Pacta demonstrant quæ Bellum omne , ante finem Induciarum prohibent. Sin talis necessitas domesticæ indigentæ , justiciam belli alicui affert , quilibet prædo latrôque , aurum , argentum , & alia præterea bona aliis diripiens , necessitate se justum atque innocentem fecerit ; Si itaque hæc , tua etiam *excusatio* est , quam Orbi Christiano obtrudis , quis miretur *necessitatem* hanc purè merèque Sueticam esse ? Finnis quidem Suecorum vicinis Tacitus miram feritatem , fædam paupertatem assignat. Quota pars Exercitûs Suetici sint hodie Finni non refert , cùm sub unum imperium , & veluti unam in gentem geniumque cum Succis coierint , morésque & indolem junxerint. Tantâ certè cum feritate & fæditate paupertatis in Poloniæ viscera irruère , ut fidem nimium fecerint utriusque nil sacri , nil profani , inviolatum integrumque relinquentes. Et hi tales non modò è rupibus scopulisque suis ferociter prorumpunt , sed etiam è genuina Gotthorum consanguinitate non novos fungos se produisse

diisse gloriantur. Et quis tam præclaras vel obsoletas necessitudines illis magnopere invideat? præsertim si Gotthi nil aliud fuere, quàm Orbis terrarum prædones, & nullius Regni aut Provinciæ justii occupatores, ideóque nec meliorem quàm meruere postremo adepti exitum: Enim verò pars eorum celeberrima Ostrogothi in vero cognomine solam circumferentes asperitatem (hoc enim *Ostro*, non verò Orientem significat) sic Italiam invasere, ut postea à Longobardis subacti oppressisque interciderint. Pars altera violentæ claritudinis sub Visigothorum apud veteres omnes scriptores, non autem sub vester ---- aut vestro-Gotthorum appellatione (ut nunc Suecia nugarur) aliquoties in Gallia ac Hispania cæsi, tandem à Mauris, ne quid ignominix deesset, obruti, extinctique, nusquam illic præsci vocabuli vestigium post se reliquere. Et tamen ab his larvis hodie nobilitatis cognatæ gloria à Succis captatur, cum nulla nisi feritatis supersit. Gotthos autem tam facile è Suecia, quàm Succos ex equo Trojano exiisse credideris. An verò ex Arca Noë in majoribus suis Sueci prodierint, cum Antipodibus aliqui dubitant, neque è bipedalibus Olavi Magni in Suecia Pyramidibus constat; nisi forte sub luporum forma, pelleque cum Cynocæphalis inde erupere: Unde nunc Lycanthropi isti, plus quàm lupino more & ferociâ passim omnia lacerant, lancinant, cruentant, vastant, diripiunt. Sed dabit Deus his quoque finem, aut laqueum, aut quodcunque aliud compendiosius, quale bellux furiosæ merentur.

Restat postremum impudentiæ Sueticæ specimen, in quod tota causarum enumeratio plus quàm Niliacâ aut Istricâ vastitate exoneratur; quo nihil impudentius, nisi à Sueco concipi potuit. Nam te Regémque tuum confidere ais, has rationes, non solum omnibus iis, qui hæc inspicient, sed etiam Reipublicæ Polonæ subditis harum machinationum ignaris probari posse. Te quidem confidentiæ Regiæ columen gnaviter impudentem necesse est, qui subditos Regis Poloniæ tuo quàm proprio Regi maiorem fidem habituros, non modò ipse putes,

speres , confidas , verùm etiam *Orbi Christiano* persuadere id audeas. Externo illos scilicet Principi & hosti , post bellum etiam , & gravissima damna cladésque illatas potiùs , quàm domesticæ auctoritati mansuete regnanti , etiam diu sese clementiâ hætenus approbanti credere velles ? Interim blandulè palpum obtrudens addis & agnoscis. *Partem subditorum Polonorum harum machinationum ignaram esse.* Innoxii ergo illi sunt , nec hostilitatem meriti , quia ignari ; cùm tamen omnes citra discrimen à Rege tuo oppugnentur , affligantur , opprimantur. Sed quas tu tamen Machinationes intelligis : Nam eas , quas tu hucusque è perpetuæ calumniæ machina eduxisti , jam contrariis machinis , prout quæque à te Umbratili & larvato Archimede eductæ fuerunt , superiùs elisæ prostratæque sunt. Quis autem illarum *machinationum* ignarus non sit , quas nec homo , nec Sol , nec Deus ipse videt , aut vidit unquam ? Quantò justius Rex Poloniæ , post bellum ante omnem legitimam denunciationem illatum , & quidem durantibus Induciis , ac pactis insuper Germaniæ comprehensus , conscientiam ac censuram Orbis Christiani , ac proximæ sinceræ semper & candidæ Germaniæ , appellare , advocare , & invocare possit ?

An verò ad Cæsaream quoque Majestatem hæc pertineat injuria , augustiori judicio ultrò submissum , & commendatum fore speramus ; ita ut jam opus non sit , in memoriam reducere duas priores causas , ob quas Succus bellum Polonos sese inferre profiteretur , à Cæsarea Majestate profectas. Una fuit à Botthio , qui cum milite & diversionis bellicæ spe atque fiducia , à Cæsare in Livoniam directus missusque fuerat ; Altera non minore impetu cum Crocovio Cæsariano itidem ductore venit , quem per Poloniam in Pomeraniam , Succorum tum temporis Provinciam vastandam , permittentibus aut non prohibentibus Polonis , transiisse & rediisse Suecia quæsta est . Prout hoc in fronte statim præsentis manifesti infert , & exaggerat ; nomine tantùm & auspiciis , imperiisque ac jussibus Cæsaris , Sueticâ calliditate reticendo. Ejus silentii causa nunc non repetetur , quæ tamen se facile prodet , ex-

ſpectentur ſaltem ſucceſſus & furor belli Suetici. Quodſi tamen ob talia aliud ſperare, ſeque aliud mereri à Cæſare putaret Polonia, quis ſpei & ſimplicitati ejus ſuccenfere meritò poſſit ?

Aliorum Principum Regumque animos ac judicia ſcrutari difficile eſt, compellare forte tardum, præſertim ſi in præoccupatos incidat. Suum cuique arbitrium & cenſura ex re aut prudentia, vel aliis cauſis eſſe poteſt, eſtòque. Cauſas enim omnes quis omnino queat vel audeat deprehendere aut nominare ? Si quem tamen metus, terror, vis avertit, ſi quis minorum gentium ſua levitas, vel ſimilitudo aliqua, ſpèſve novæ mutavère aut corrupère, nihil à ſeculi, indoliſvè aut moris ſui exſpectatione alienum fecère. An verò aliqua etiam Aula auro (quod tamen in Suecia naſci negant) Suetico corrupta fuerit, illi ſoli ſciunt, aut credunt, qui illíc inſuper preciſis Moſchorum pellibus, adèò emollitos & ſuffultos aliquos viderunt, aut vidiffè ſe putant, ut humaniſſimo favore barbaram perfidiam præ Polonorum innocentia commendatam atque approbatam, habeant, prædicent, tueantur. Alii nunc ſucceſſibus & eventui, peſſimo ac perfidiſſimo Auctori paſſim fortè accedunt ; Et fortuna plerumque pro juſticia eſt ; Qualia paſſim olim, & nuper exempla per Regna Inſulàsque, nec ſemper incruenta incedunt, neque illaudata.

Suecis verò poſt omnes cauſas, conatùs ſpèſque, quid niſi occaſio placuit electaque eſt ? Cùm Rex ipſe Sueciæ Legato Polonico Stocholmiâ abituro, non dubitaverit glorioſè profiteri : *Poſtquam Tartari, Coſaci & Moſchi plurima in Polonia diriperent, ſe quoque partem aliquam rapturum.* Cùm ergo id palàm, animo votoque toto, Rex Sueciæ deſtinaverit, in hoc quoque viribus ac ſucceſſibus omnibus eum incubuiſſe jam obſcurum non eſt. Potuiſſes ſanè in principio, mitiori proverbio uti, videlicet, *occaſio facit furem*, niſi pluribus ſyllabis majorem, nempe *furioſum*, Cauſarie, feciſſes. Occaſio certè nefas totum validius impulit, implevit & perfecit ; dum Ruſſia, Poloniæ pars magna à Tartaris vexata, à Coſacis oppreſſa, Lithvaniæ verò Ducatus magnus cum annexis Provinciis, à Moſcho contra fidem pactaque publi-

ca perfidè occupatus, Regisque nostri vires per scelus alienum aut novas calamitates ubique debilitatæ essent. Sed vile fortassis & infame est proverbium, quod furem Regem ex qualicunque etiam occasione faceret. Nec satis Rege dignum, quod patientia læsa statim faciat furiosum. Regium ergo & Carolo Gustavo dignum est, & quod non nisi à Regibus usurpari meritum fuit.

Si violandum est Ius, Regni causâ violandum est.



